

# 序

熊盛元

丙戌上巳，江右诗社成立于南昌象湖之滨。江右者，即江西也。此称最早见于《南史》卷三四：“是时，议者以延之、灵运自潘岳、陆机之后，文士莫及，江右称潘、陆，江左称颜、谢焉。”《宋书·谢灵运传论》亦曰：“遗风馀烈，事极江右。”盖其时以江右代指西晋，而称东晋为江左也。清人魏叔子《日录·杂说》则曰：“江东称江左，江西称江右，何也？曰：自江北视之，江东在左，江西在右耳。”窃以为此说最为圆融。

江右诗人之祖，自当首推渊明。昭明太子称其诗“独超众类”，“莫之与京”，诚非虚誉。有唐一代，江右诗人虽甚寥寥，然刘昫虚、綦毋潜、熊孺登、王贞白、卢肇、郑谷、沈彬等亦堪称一时之彦。洎乎赵宋，江右吟坛，大家林立。晏、欧小令，开西江词派；山谷之诗，启一代宗风。杨诚斋之“活法”，借鉴荆公；姜白石之“清空”，溯源鲁直。其流风馀韵，历元明清三代，未尝断绝。近代以还，文芸阁拔戟西江，与清季四家分庭抗礼；陈散原希踪北宋，擎义宁一纛引类招朋……

吾侪生于斯土，沐前修之遗泽，其幸何如！昔吕居仁有“江西诗社宗派图”，自山谷以降，列陈师道、潘大临、谢逸、洪刍、饶节、僧祖可、徐俯、洪朋、林敏修、洪炎、汪革、李錡、韩驹、李彭、晁冲之、江端本、杨符、谢薖、夏倪、林敏功、潘大观、何颙、王直方、僧善权、高荷等二十五人以为法嗣，而今日江右诗社成员之数亦略相当。惟宋人之社，瓣香涪翁，风格相近；而吾侪则崇尚不同，性情各异。彭泽汪方湖前辈云：“文学递嬗之迹，必前有

所创，而后有所承。善学前人者，非学前人体制而模拟貌袭也，必变化镕铸之，方足自成体格”，旨哉斯言！

“旧学商量加邃密，新知培养转深沉”，此朱文公之诗也。吾社同人本此微旨，编选《江右风雅》一书，内分“象湖立社”、“萍乡雅集”、“社员风华”、“四海诗鸿”四部分，共计诗词 665 首。海上耆宿周退密先生为本书题签，特此鸣谢。

余本驽骀，蒙社中同仁不弃，嘱为隍引。论诗谈艺，非吾所长，聊引方湖先生《学诗一首示浚南》，与诸君共勉：

真味初如食橄榄，庐陵妙语是吾师。  
能于旖旎存风骨，且学婀娜见雪肌。  
绮语忤除嫌未尽，风骚扬榘赖扶持。  
仙人姑射如堪见，绰约高怀寄所思。

丁亥十月十八日于南昌青山湖畔

## 目 录

序.....	熊盛元 (1)
目 录.....	(1)

### 象湖立社

一得愚生.....	(1)
天石心、天堂有鸟、云中鸾.....	(2)
水击三千、龙文鸳侣、东华人氏、东篱菊.....	(3)
刘雪樵、齐卿、江湖小李.....	(4)
红叶、草啸.....	(5)
赵连珠、剑川.....	(6)
剑尘.....	(7)
浔阳倦客、菜人.....	(8)
虔青草、海风、剧饮千杯.....	(9)
黄安、黄河入海、楚成.....	(10)
虞某人、鄱湖渔歌.....	(11)
鹰鸣.....	(12)

### 萍乡雅集

一得愚生.....	(13)
一壑自专、王冰.....	(14)
天山一剑、云中鸾、云海.....	(15)
公子无痕、风过苍筠、心魔.....	(16)
水击三千、叶子.....	(17)
叩石山人、东华人氏.....	(18)

仰斋、向闲.....	(19)
齐卿、安然、江湖小李.....	(20)
红叶、张苍烈.....	(21)
张伯元、青青子佩、雨如.....	(22)
金水.....	(23)
昆阳子、草啸、柳堂.....	(24)
剑川、剑尘、浔阳倦客.....	(25)
菜人.....	(26)
殊熠在天、虔青草、剧饮千杯.....	(27)
梅云、皎月.....	(28)
清角吹寒、深南大道.....	(29)
紫藤、楚成、虞某人、意而.....	(30)
颖庐.....	(31)
鄱湖渔歌.....	(32)

### 社员风采

一得愚生.....	(33)
天堂有鸟.....	(37)
云中鸾.....	(39)
云海.....	(44)
水击三千.....	(48)
东华人氏.....	(51)
仰斋.....	(54)
向闲.....	(58)
江湖小李.....	(62)
红土川原.....	(64)
红叶.....	(66)
抱月斋.....	(68)
草啸.....	(71)

剑川.....	(74)
剑尘.....	(77)
胖大海.....	(81)
浔阳倦客.....	(83)
菜人.....	(86)
殊熠在天.....	(87)
虔青草.....	(91)
剧饮千杯.....	(94)
梅云.....	(98)
皎月.....	(102)
紫藤.....	(107)
楚成.....	(110)
颖庐.....	(113)
鄱湖渔歌.....	(117)
鹰鸣.....	(120)

### 四海诗鸿

丁小玲、三水、三江有月.....	(121)
门前五柳、天一谷.....	(122)
王冰、王蛰堪、王燕、小香山.....	(123)
无稽斋主、公子无痕、风过苍筠.....	(124)
月影轩主、文若、方知秋.....	(125)
叩石山人、东篱菊.....	(126)
白晓东、血叶兰、刘雪樵、齐卿.....	(127)
安宁狂生、江左人氏.....	(128)
江南雨、苍篁、红尘.....	(129)
苏痕、杏花笛影、李静风.....	(130)
谷海鹰、阿咸、冷锋.....	(131)
青青子佩、张伯元、张力夫.....	(132)

---

林清晓、雨如.....	(133)
金水、赵京战、秋灵.....	(134)
临川沐风、贺兰吹雪、离垢居.....	(135)
海风、梦烟霏.....	(136)
萧散、散柯、绿杨烟外.....	(137)
翰海胡杨、饕庵.....	(138)

## 附 录

滕王阁雅集启.....	剑川 (139)
江右诗社成立大会纪要.....	剑川 (140)
周年庆典萍乡小石源雅集侧记.....	江湖小李 (142)
江右诗社名录.....	(143)
江右诗社大事记.....	(144)
跋.....	(145)

## 一得愚生

### 次韵剑川《江右诗社即立先寄诸君子》

不堕诗心可以群。诸贤累代著殊勋。野人未肯矜村语，  
微力何堪运大斤。隔网同分元亮井，挥旌重整贛家军。相  
期携手春三月，山谷风烟带雨耘。

### 题上巳日滕王阁雅聚

飞阁江烟翠，和风化九韶。文章同气味，市井任喧嚣。  
命笔春难画，停云鹤可招。一堤杏花雨，点滴涌成潮。

### 贺江右诗社成立

吟旌小竖象湖边。夹岸桃花醉欲燃。细听春风敲竹籁，  
漫飘诗雨上鸢肩。盟虽初定千秋在，道不曾孤一线悬。未  
必俱成探骊手，分携余味种清烟。

### 题象湖断桥

湿翠熏红各自娇。桃源一望水迢迢。何当借我神丁斧，  
斫取长虹接此桥。

### 象湖雨中聚饮

好友招邀一畅怀。湖光荡漾向人开。春风若解诗情趣，  
化雨涓涓漫酒杯。

### 偕同社诸君游青云谱八大山人故居

青云有梦画凌烟。挂眼江山独怆然。五桂难寻劫灰后，

绿溪长绕故居前。悖情管笔弃斯世，亡国衣冠剩此瘢。哭笑当时矜一问：人间换了是何年？

### 天石心（南昌）

#### 次韵剑川《江右诗社即立先寄诸君子》

道合天涯也聚群，经营文字耻求勋。敢邀孺子争论句，怕看阳明运斧斤。点指草根图结社，立身赣抚欲成军。匡庐真貌共探索，采得风云齐笔耘。

#### 草一绝贺江右结社开坛

喜见幽林新出笋，春风眷顾好扶摇。几番雪砥霜磨后，或可参天傲九霄。

### 天堂有鸟

#### 江右诗社象湖会议

象湖九里碧云天，雅席传诗柳水边。七份投缘三份醉，桃花照影尽酡颜。

### 云中鸾（女）

#### 次韵剑川《江右诗社即立先寄诸君子》

芙蓉金顶自超群，岂意麒麟阁著勋。早许笔花修月手，无劳馱舌运云斤。清游归去羽人迹，秀岫竟招娘子军。今向鄱阳湖畔过，云松深处众耕耘。



## 水击三千

### 与江右诸君游八大

携雨青云外，遗园瞻古风。林幽鸟鸣翠，花落水漂红。  
有恨山河在，怀悲远近同。涵然石上坐，相与论飘蓬。

## 龙文驾侣（赣州）

### 贺江右诗社成立

龙光射牛斗，盛世璨文章。不挽风潮劲，焉知事业长。  
浮生或多慨，拼死亦何妨。笑顾两子，浴沂风咏忙。

## 东华人氏

### 贺江右诗社成立

上巳群贤乘兴游，岸花汀草具风流。枝头燕语今传讯，  
江右诗坛韵已稠。

### 丙戌上巳日

象湖春色好，半雨半天晴。簇簇桃花艳，枝枝柳叶菁。  
豫章诗韵起，结社江右名。无意争魁斗，风流笑自成。

## 东篱菊（女，靖安）

### 贺豫章（江右）诗社雅集

百年去何速，夫子叹悬瓠。遂令千秋士，弹剑耻埋珠。

况我江右客，风流自古殊。徐孺陈高义，元亮卧鄱湖。四海传声价，意气各相输。三千才子笔，不让金仆姑。何期鼎革始，大雅久荒芜。遗韵遥可仰，孰克箕与裘。幸有贤君子，振臂一为呼。结社滕王阁，天风开远图。时当上巳日，流觞皆鸿儒。或来千里外，征尘入衣裾。或居城门侧，临溪话莼鲈。樽催玉山倒，人欣道不孤。兴酣呼笔墨，千章成须臾。咳唾生珠玉，满座争执壶。欢会能几许，春衫尽意濡。酒阑诗笺满，出门各相扶。朱颜间白发，放歌过长衢。不识夜如许，但惊灯火疏。

刘雪樵（女，北京）

### 遥贺江右诗社成立

杨柳毵毵士比肩，秉藜结社象湖边。文章末道担忧患，社稷头筹访圣贤。鹭落江帆秋水窅，云停牯岭夕阳妍。赣鄱今岂虚豪杰，更看风骚一百年。

齐卿（长沙）

### 陶公庙（作此以寄老表）

泥道入村晚，湘山日已斜。松前看石凳，庭外举桐花。往迹谁知晋，新天梦作家。九江如有信，依旧采春华。

江湖小李

### 次韵剑川《江右诗社即立先寄诸君子》

冲天鸿鹄正呼群，晒陋凌烟邈策勋。自信文章光代代，

屑为铜臭较斤斤？人间春月乐花事，网上男儿张赣军！异日续编江阁志，当留笔墨纪耕耘。

## 红叶

### 次韵剑川《江右诗社即立先寄诸君子》

喜见微名入众群，愧无才气助奇勋。人逢喜事频添句，酒过唇边懒论斤。天下风流无主次，江西诗彩起新军。此行不惧诗肩瘦，老土经春正可耘。

## 草啸

### 次韵剑川《江右诗社即立先寄诸君子》

客久倦离群，殷勤待著勋。尚无心一聚，何况酒千斤。传檄招人脉，擎旗树赣军。家山春社后，碧自力耕耘。

### 上巳日雅聚暨江右诗社成立

藉网传风信，群贤聚阁前。春围三月岸，人带一湖烟。剧饮诗元素，欣同社比肩。西江持俊笔，不绝落花天。

### 访八大山人旧居

青云倜傥水村风，往复生涯客不同。只有山茶花自大，当春摄取一池红。

## 赵连珠（天津）

### 次韵剑川《江右诗社即立先寄诸君子》

发藻西江迥不群，馭空才气勒殊勋。棘端琢刻皆成物，鼻侧删留好运斤。伯乐图中安六骏，亚夫营里募三军。骚坛此际春风度，九畹芝兰和雨耘。

## 剑川

### 江右诗社即立先寄诸君子

卓尔风流各不群，敢望骥尾策奇勋。文章敷衍难成句，酒量忽悠可论斤。故垒新排三剑客，雄关老去上将军。还将青眼报吾子，锻炼声名此励耘。

### 丙戌上巳江右诗社成立贺诗

吾乡节义邦，名贤侔邹鲁。风高陶元亮，群伦咸拜舞。欧阳并曾王，文章推宗主。涪翁开新派，西江传法乳。文山忠烈臣，雄词热肺腑。恢奇陈散原，风云恣吞吐。俊采如星驰，联镳还接武。大厦忽倾隳，爝火真一缕。大雅日式微，百年势末弩。诸君思振作，勒兵收部伍。揭帖招同仁，檄传似飞羽。吾其马前驱，倾盖誓肱股。慷慨订新盟，从容立旗鼓。楚材于斯盛，建节开幕府。声遏南浦云，韵卷西山雨。生面此别开，踔厉势如虎。江山供铺张，乾坤一仰俯。尔我任在肩，勋名期铜柱。

## 象湖

柳眼方舒雨露匀，桃花先占岸边春。棹歌唱罢青山在，

载酒江湖一问津。

### 八大山人纪念馆观画

不僧不道不樵耕，写竹一枝听雨声。世事荒唐堪哭笑，寒乌白眼为谁横。

### 剑尘

#### 次韵剑川《江右诗社即立先寄诸君子》（2首）

人似孤星总不群，只从邨架问功勋。小城来往能弹镊，吃语存删每待斤。耳畔丁丁谁伐木，梦中猎猎此张军。杜鹃当唤春如海，倾入砚田堪细耘。

**注：**黄庭坚《陈留市隐》：市井怀珠玉，往来人未逢。乘肩娇小女，邂逅此生同。养性霜刀在，阅人清镜空。时时能举酒，弹镊送归鸿。

嚶嚶健翮正呼群，来共湖湘著令勋。芹藻今看同结网，揆才犹待两兼斤。亦从山谷分遗乳，不合散原为殿军。此后心田三万亩，惠风时雨好深耕。

### 滕王阁畔雅集

雄州胜侣此纷临，一契名楼千古心。风雨江山须大笔，不耽杯酒日清吟。

### 象湖午宴

柳色澄湖别有天，两三微雨漾清圆。所愁芳宴飞觞罢，拂水飘绵一惘然。

### 谒八大山人纪念馆

遗恨甲申早化灰，空庭何事却低徊。老柯深处啾啾鸟，还向青天白眼来。

### 浔阳倦客

#### 次韵剑川《江右诗社即立先寄诸君子》

兴观怨刺且能群，浅唱何曾计大勋。新句漫成敲律韵，陈言痛剜借刀斤。已多唼唼陶钧手，更有赳赳网络军。薪火相传期你我，纸田屏地好耕耘。

#### 拟赴滕王阁雅集

似赴千年约，如归万里心。层楼聚灵气，高阁响清音。妙笔精神老，幽言寄托深。长吟扬大帜，人物满江浔。

### 菜人

丙戌上巳江右诗社于南昌象湖成立，予亦忝随其后，因赋二章聊以寄趣，有序

时逢莺月，人在象湖。树吟旌于江右，会诗友于城隅。觞，欲止不止；雨，似顾非顾。座中红树在望，行处绿杨随步。拣他佳处二三，着我狂人十五。或立小桥，或游远渚。人见之谓有会稽之致，孰知我欲光彭泽之事。已而车乘二线，路出三环。自万寿宫，至八大山。身行柳岸，影落梅湖。人谓另类，谁识吾徒？入山房，穿竹径。观书画，品题赠。适来方午，迨归已暮。诗曰：

永和三日象湖滨，只有骚人无丽人。建社树牌称我意，催诗传盏落谁身？几为网上输心久，多是座中谋面新。不

堪大雅衰微甚，因共此来期一振。

象湖游罢转梅湖，昔有王孙宅此区。水面流红花片片，墙头透绿树株株。人过但赏园林巧，物睹谁叹画作殊？我辈今来僧去后，山房虽在只如无。

## 虔青草

### 次韵剑川《江右诗社即立先寄诸君子》

古韵常吟未有群，倾心唱和俱多勋。钟情句句堪称典，会意篇篇可正斤。网络诗词逢挚友，滕王殿阁聚新军。凝眸静待佳音至，从此风流荟萃耘。

### 阮郎归·贺江右诗社成立

春光明媚草将青，欣欣清气生。且闻江右聚诗朋，故乡诗社成。心愈喜，意方兴。豪情寄彩屏。豫章古韵更峥嵘，仁人多赴盟。

## 海风（星子）

### 江右滕王阁雅聚，因事未赴，遥想盛况，诗赠诸公

滕王高阁倚江头，江上云飞若水流。谁识阁中真帝子，青山名士两悠悠。

## 剧饮千杯

### 上巳日偕江右同社诸君游青云谱八大山人纪念馆

岁时春正好，古井颇安澜。石作凝云黑，花经细雨寒。

星沉伤汉祚，龙隐沥商肝。寂寞庭中树，千年例不刊。

### 黄安（都昌）

#### 次韵剑川《江右诗社即立先寄诸君子》

不羨西山鸾鹤群，争趋滕阁立功勋。自惭散木难绳墨，愿乞诸贤赠斧斤。十亩绿遮陶宅柳，满江红唱岳家军。当仁我辈传新韵，艺苑春深带雨耘。

### 黄河入海（山东）

#### 次韵剑川《江右诗社即立先寄诸君子》

豫章文士气超群，继古开今欲树勋。胜迹曾留才子赋，诗坛再舞匠人斤。邀朋共结江西社，作序何期王右军。三月春光播种后，土肥还待细耕耘。

### 梦落篱菊（女，陕西）

#### 次韵剑川《江右诗社即立先寄诸君子》

绕枝灵鹊已成群，不堕斯文盛世勋。锦瑟闲时弹古调，翰林深处问新斤。春风树蠹迎骚燕，赣柳追云募雅军。借得滕王遗韵地，诗田踏垄细耕耘。

### 楚成

#### 次韵剑川《江右诗社即立先寄诸君子》

古韵悠扬思不群，同侪结社著新勋。半山鸿志文堪帅，



五柳闲情酒论斤。山谷遗风何怅惘，散原传者乐从军。滕王翘首招贤士，王勃领衔期众耘。

### 参加江右诗社成立有感

江右树新坛，群贤古韵弹。寻根抚水畔，逐梦赣云端。滕阁春初染，象湖天际漫。临川光照处，气卷万重澜。

### 与诗社同仁游八大山人纪念馆步商隐斋主人兄韵

伫立唐槐认劫灰，幽幽小径几低徊。残山剩水枝头鸟，犹向吾侪青眼来。

### 虞某人（景德镇）

#### 次韵剑川《江右诗社即立先寄诸君子》

史河文采灿星群，诗派开宗树伟勋。才到洛川量以斗，眼观肯綮解随斤。犹残故梦庇寒士，更举新旗作殿军。偶恨南山非净土，四乡却似画春耘。

### 鄱湖渔歌

#### 次韵剑川《江右诗社即立先寄诸君子》

皓发惶惶拟入群，为谋椽笔着新勋。未吟八韵歌江右，窃喜诗坛有斧斤。劫罅常嗟弱冠梦，振兴且待少年军。春风既送滕王阁，鄱赣从兹细细耘。

## 鹰鸣

### 次韵剑川《江右诗社即立先寄诸君子》

俊彩星驰网络群，共襄盛举建奇勋。新诗得意抒鸿志，  
炜管如林似铁斤。山谷追风君振臂，豫章树帜我从军。春  
光三月千峰翠，蓬勃生机画里耘。

### 贺丙戌三月江右诗社在滕王阁成立

身随高阁上重霄，放眼江天万里遥。雾列雄州分两岸，  
车飞险堑贯三桥。编钟曲唤强唐梦，赣水春掀拍岸涛。江  
右于兹诗会盛，笔花烂漫领新潮。

### 拜谒八大山人纪念馆

山人居处景清幽，古木森森有鸟啾。院外老桥横绿水，  
堂中浩气逸凉飕。穷而尚道诗书画，生不拜君家国仇。玩  
世逃禅常哭笑，明皇后裔一骅骝。

## 一得愚生

江右周年萍乡小石源谷雨雅集在即，先寄诸君子

又是江南三月初。青钱摇落买舟车。一年风雨春相似，  
别样溪山梦不如。暂脱俗骸同野鹤，好将诗笔作烟锄。文  
章大块早铺就，归橐清芬到我庐。

初访小石源次韵汝启（进退格）

炊烟真欲与云齐。山半幽居隔路歧。家犬小怜迎远客，  
野蔬新摘带春泥。徐舒醉眼非关酒，狂放诗心不忌辞。草  
木自然成境界，人间笔墨岂堪题。

游孽龙洞有感其更名为义龙洞用进退格

一洞幽深鱼贯行。眼前顽石幻奇形。或为虾螯依崖立，  
曾佐龙蛇倒海惊。过处阴风犹凛冽，当年恶迹渐零星。也  
无轻怪后来者，竟把妖邪冠义名。

谒文芸阁墓

踏破荒烟向一隅。万竿翠竹拥坟孤。细摩字迹沧桑辨，  
若见文公涕泪俱。新法当时成废纸，后人至此束生刍。可  
怜亘古山河在，家国忧怀最误儒。

雨中凭吊盛公祠，传为矿难造棺处

车行缓缓到安源。乍起雷霆城欲翻。数片残英浮碧水，  
一天急雨洗荒垣。当时但恨世多舛，此刻谁怜鬼有冤？苦  
难于人略相似，楼头伫立各无言。

## 一壑自专（江苏）

公务在身无暇赴小石源诗会，谷雨日次汝启先生韵

千山布谷应声齐，接引舟车道不岐。钝笔欲沾辋川墨，芒鞋却负石源泥。文章自古出江右，骚雅而今吟楚辞。遥想楝花风起处，高贤满座正分题。

遥知别业倚山斜，路转溪桥入竹笆。绿蚁浮瓯频斗酒，旗枪过雨漫分茶。人翻青眼皆相重，事比兰亭料不差。却恨尘丝羁我足，无缘荝席按红牙。

## 王冰（北京）

### 滕王阁

江干星聚述文华，重阁春阴曲槛斜。远水色分游子目，苍烟人杳帝王家。因从晚唱惊孤鹭，也思清樽酌落霞。洪府词宗今古盛，长垂一脉更无涯。

## 青云谱

无端哭笑入吟哦，笔底生灵白眼多。画史灯传新岁月，王孙门掩旧山河。狂居僧道输情债，乐报屠沽是酒魔。寂寞癯肩犹未去，风神渺渺动新荷。

### 杨岐宗普通寺

林峦隐露抱村隈，向晚山门扣未开。方竹也从人品悟，古松遥对世情哀。具闻佛性同鸡犬，只信灵根在草莱。农事但如春水急，新秧绿到诵经台。

## 天山一剑（萍乡）

### 访杨岐普通寺

翠柏参天寺院幽，丛林树密鸟啁啾。唐碑字字墙头刻，  
涧水潺潺石上流。临济开宗旺东国，杨岐立派耀千秋。皇  
家一统谁长在？不及禅风遍九州。

### 再谒文廷式墓

万里山河暗，西风卷暮云。园兴多急士，国破岂存君。  
金殿囚孤主，杨岐寂一坟。石残荒草畔，拂拭辨碑文。

## 云中鸾（女）

### 未克与会次韵汝启兄小石源诗会

歌云争与岫云齐，一带清吟若凤岐。入耳瑶章催酩酊，  
画眉工笔竟拘泥。物华但使高标识，诗思真从俗客辞？恐  
爱诸君风调好，早将丽句翠屏题。

## 云海

### 次韵江湖小李两首

江雨霏霏江草齐，人生无奈路多歧。从来随俗恒当道，  
自赏孤芳总堕泥。机遇同时还对等，萧条异代更何辞。此  
身未到萍乡聚，痴绝诗心梦也题。

澄湖雨逐柳风斜，颺望萍乡倚竹笆。铁仔当年唯傍井，  
蜗居此日不香茶。文联混日休将退，江右厕身远尚差。盛  
况随园欣雅集，何曾云海挂君牙？

水龙吟·吊文廷式同文公韵和梅云兄

禁烟寒食清明，荒坟不尽书生意。城临敌寇，廷环奸宄，宋清末世。鸦片吹云，花纲叠锦，江山危矣。笑天朝上国，坚船利炮，唯流血，空斋志！正是欧风东渐，叹维新，断肠声里。公车伏阙，帝师妖后，长嗟遭际。井底观天，瀛台对月，逐臣凄翠。又神州改革，倘争球籍，得文公起？

公子无痕（女，昆明）

次韵江湖小李

小院新花倚槛齐，忘忧碧草染黄歧。人闲友酒逍遥惯，燕重柴门断续泥。径远仙乡惜未到，心期雅会欲成辞。叹无锦句愁何赠，拈取群香碾入题。

风过苍筠（女，驻马店）

萍乡雅集步江湖小李韵

去岁象湖云聚齐，今朝化雨到杨岐。一山抱屋烟翻碧，百鸟喧林红落泥。薯酒频斟酬远客，蛮笺漫展竞芳辞。我来亦有千般慨，可附诸君骥尾题？

心魔（长沙）

小石源雅集步李汝启兄韵

江右风流讵可齐，东西南北信无岐。诗心已织春蚕茧，谷雨时沾燕子泥。花借阴晴香自在，人增意气酒难辞。野

鹃红透溪山处，仰愧诸君有品题。

### 小石源雅集归来漫赋

山水清嘉小石源，人间四月酌寒温。击胸且讶千红艳，  
养眼犹欣万绿繁。薯酒真如茅酒醪，今人不让古人尊。座  
间名士半天下，江右风流仔细论。

### 水击三千

#### 访小石源

辋川不识久，斜径入云间。松竹池边茂，清风石上闲。  
高谈谐雅意，晚照映朱颜。小犬欲留客，绕行未肯还。

#### 谒岐山文公墓

斯人无力挽倾天，有恨难消诚可怜。铁骨百年遗素冢，  
山花一捧奠乡贤。露侵宿草青犹腐，苔蚀残碑拭未全。几  
处杜鹃惊日暮，岐峰渺渺漫云烟。

#### 与诸诗友游孽龙洞

欲觅藏龙处，空山洞府长。危阶拾灯火，残乳认洪荒。  
白石谁曾煮，麻姑酒未将。临渊问流水，风送末名香。

### 叶子（女，石家庄）

#### 小石源雅集次汝启兄韵

八方俊彦一时齐，风拂尘烟远路岐。为访石源生雅趣，  
还披谷雨踏新泥。琳琅满目诗相映，潋滟盈杯酒莫辞。我

亦微醺逐霞梦，吟怀幽仄不堪题。

### 叩石山人（北京）

#### 闻江右居庸诸君小石源雅聚

一去高楼涤宿烦，清思三月到乡村。新茶不待铜壶煮，春水已从云路吞。万里驰书羨燕客，群贤纵笔起湘魂。风骚若许偏江右，此日须看小石源。

### 东华人氏

#### 造访小石源次韵主人《君将访，小石源先期恭候》

新竹披衣谷雨齐，春风引领路无歧。石池浅溜山泉水，木凳多沾野径泥。择业悬壶医疾病，垒居磨笔写清辞。八方好手今邀至，午后挥毫带醉题。

#### 将之小石源梦已大醉有作

一夜啼鹃遥可闻，去心迢递自殷勤。春山绿黛侵晨雨，柳岸青烟接暮云。客路将由车辙轧，诗怀更待暖风熏。石源才报封缸好，梦里贪杯醉十分。

#### 谒文廷式墓

风流万代几人存，江右前贤我辈论。不惜直言资国计，漫将健笔着词魂。穷途海上篷桡转，潦倒云轩纸墨吞。身后百年寻墓在，杨歧松竹固山根。



## 仰斋

### 小石源山庄雅集次主人江湖小李韵

歌啸相亲小队齐。个中有风若鸣岐。山深虎过风嘶涧，  
雨霁林添笋出泥。辉壁墨光芬可挹，撩人家酿醉难辞。幽  
居偏富江湖趣，又得燕云椽笔题。

## 向闲

### 次韵汝启兄小石源诗会

蕉柳初栽与臂齐，幽人高卧研黄岐。风生汗息心趋静，  
客至门开酒剥泥。雅士高僧增远意，城关江右到新辞。奔  
波愧我形骸陋，满目珠玑不敢题。

### 江右诗社萍乡雅集

诗朋八方聚，花笑树能言。才出深山洞，旋登小石源。  
宜将钟吕曲，压倒鸟虫喧。江右多灵杰，重开一纪元。

### 义龙洞

孽龙已有义龙名，神话未能板钉钉。造海营洲心可赞，  
斗仙抗佛勇堪铭。洞中老瀑仍迎客，病里顽童不数星。休  
问逆鳞何处锁，世间多少链无形。

### 谒文廷式墓

翰院书声海上烟，百年来我拜前贤。路边竹笋绿离箨，  
岭表鹃花红欲燃。赤子痴心长玉碎，帝王家事枉情牵。晚  
生亦有多般痛，且借青山歇铁肩。

### 游盛公馆

旧馆生蛛网，烟尘覆盛公。青山依次矮，黑土逐层空。  
小命如煤价，神州未大同。百年兴废里，谁是主人翁？

### 访杨岐山普通禅寺

真庭多冷落，假庙香火稠。泥路难追拜，喝声应可留。  
入门先绕道，出寺莫回头。山势今知险，清溪不语流。

### 齐卿（长沙）

#### 步小李兄韵并致江右萍乡诗会以贺之

南山松客入云齐，江海剩吾归路岐。谁去赤乡收谷雨，  
梦来乌燕寄春泥。明月初三今不晤，寒樽唯独夜难辞。遥  
遥东岭庐居事，未止屏前一页题。

### 安然（女，辽宁，现居美国）

#### 遥想小石源诗会用主人诗韵

一脑烦丝理未齐，只因夜夜梦杨岐。春光着意池塘柳，  
泉水清心野菜泥。痴望墨翁挥宝墨，醉听辞客赋新辞。他  
年若得高师法，也去石源壁上题。

### 江湖小李

#### 诸君将访，小石源先期恭候

江北江南俊彦齐，春风一路上杨岐。岚光解趣花燃眼，  
好雨知时笋破泥。小径篷门邀可到，丰窑土酒醉何辞！石  
源欲续随园雅，遍向时贤索品题。

行过青溪路渐斜，案山关下见篱笆。远迎客到呼黄犬，吩咐人来煮碧茶。崖上野花香烂漫，庭前石凳列参差。家鸡土菜莫嫌简，毕竟回城可祭牙。

近午荒村酒气醺，一时杯盏闹纷纭。呼兄招弟揖新友，说网称坛论旧闻。版上几回凭意气，座中半是邀功勋。相邀更订来年早，莫遣来年笋入云。

## 红叶

### 萍乡宴散回南昌高速路上

驰骋公车笑未闻，归程正值雨纷纷。稀疏真掩山形迹，抑是离人酒半醺？

### 次韵汝启兄

烂漫春花春草齐，歌诗一路上杨岐。时听野瀑鸣深谷，不厌轻鞋过浅泥。已是人间成画卷，何须笔下费章辞。此身久远山林趣，幸有东君仔细题。

### 东华兄邀游滕王阁与居庸诸子同登限“华”字

登临一望揽烟霞，千里来寻意自奢。槛外吹云风细细，桥边扶水柳斜斜。偶逢乱雨飞檐过，不碍新朋谈兴嘉。纵是名楼犹可赋，吟怀未忍负高华。

## 张苍烈（美国）

### 次韵江右诗社萍乡谷雨诗会李汝启题小石源

辽光出律抚天齐，泽厚余幽湛渚岐。并币玄霞穷火碧，即挑蟒岳折膏泥。或言命赋留春作，应遣桃章化燕辞。雨构林空心半晦，原须过境到闲题。

## 张伯元（北京）

### 东华兄出题写滕王阁押麻韵带华字

登楼不能赋，隔水望天涯。孤鹜云边远，夕阳心外斜。  
知鱼曾是我，解饮并非茶。过路零星雨，轻轻说法华。

### 四方竹

人心多不古，厚道成酸腐。身有四边棱，天生为动武。

## 青青子佩（女，南通）

### 江右诗社萍乡雅聚未能成行因寄诸君

萍乡三月草初平，惜我未能成此行。半垄金花云脚远，  
一痕碧水橹声轻。推杯急就豫章赋，揽胜难辞鸥鸟盟。料  
得他年停歇处，春光醞醞忘归程。

## 雨如（唐山）

### 游孽龙洞

何年何月谪红尘，草木生时失老鳞。腹纳峰川行辗转，  
石悬肝胆见嶙峋。风云吞吐三春雨，恩怨交加百孽身。归  
去犹闻泉在耳，千秋耿耿已难陈。

### 过小石源戏作

小石园中驻一程，风光人意走相迎。青溪翠筱诗家兴，  
黄耳丫童主客情。薯酒留君应自醉，春山嫁我是天成。先

能得句直须赋，莫有新裁不与争。

### 杨岐山普通寺

古寺初相访，禅林暮霭垂。烟岚滋竹色，典事没残碑。  
礼佛千重沐，回身百念縲。何能轻解脱，不复有欢悲。

### 谒文廷式墓

竹树深林旧迹寥，荒台寒烬野烟烧。残碑古寺遗臣梦，  
落日幽州记圣朝。芳草一丘春没落，功名两柱雨飘摇。书  
生到此还三拜，总是精魂未可招。

### 金水（北京）

#### 与江右诸友登滕王阁限压华字

当年一序启风华，雅会重开意更奢。槛外长江千岁月，  
城中广厦万人家。能无感慨连今古，自有吟哦动迹遐。我  
愧南来耽玉酿，临风难绽笔端花。

#### 与江右诸友雅聚于汝启兄之小石源醉题

白云深处绝红尘，雅集初吟小石源。欲得琳琅诗百首，  
先倾滟澂酒千樽。花间风暖香如梦，岭上林幽绿沁门。谁  
谓今人输古意，斜川趣味几回温。

#### 与诸友过杨岐山独自先下

岩壑参差草木馨，时闻墟落有鸡声。湿林不雨仍淅沥，  
返照无人犹晦明。境静何妨歧路远，风和更爱晚云轻。世  
间多少悠然意，难得今朝做独行。

### 谷雨诗会作业步汝启韵

燕云直与赣云齐，尘外何曾有路歧。且喜东君知雅集，  
来教细雨洒香泥。樽前尽是吞江兴，笔下皆为夺锦辞。更  
有绕梁余韵远，清游不必右军题。

### 昆阳子（镇江）

#### 次韵汝启小石源诗会

野花思与短篱齐，小石源中路不歧。北马南船征墨侣，  
青山秀水印鸿泥。罗霄空有趋朝意，刀笔难为来去辞。寄  
语诸兄多仔细，赖分诗料共吟题。

山含花气日低斜，黑狃亲人出绿笆。河岳英灵寻旧迹，  
宗门法座捧新茶。诗风江右泽俱远，文运国中隆未差。白  
浪兼天涌千叠，谁从坛坵矗高牙？

浮白萍乡客渐醺，文公墓祭想纭纭。新儒逃海日堪翳，  
老竹摩天鹄可闻。世废有才时扣角，诗雄无用永垂勋。从  
今不信雕龙术，畏路风烟等卧云。

### 草啸

#### 与江右诸友游萍乡孽龙洞赠汝启李兄

石腹元非大，居然卧此龙。吹云千万里，不藉海天风。

#### 谒文廷式墓

岁月知荒草，惟松立冢旁。慨然纷乱世，埋没好文章。

#### 访杨岐普通寺

僧能遥避世，坐壑亦开天。自种方圆竹，灵台独见禅。

### 次江湖小李兄诸君来访诗韵

四面青山与日齐，美人高卧在杨岐。好林荫庇石源舍，幽草香埋云脚泥。傍得柴门诗可种，吟来谷雨众难辞。诸君但看龙蛇迹，醉里松烟沥液题。

### 赴萍乡途中

春深绿已万般多，便策长车掠过河。抛向水田秧自立，犁开牯角岁新磨。馒头野岭炊烟啖，玉带清溪草甸拖。只羨身如轻巧燕，追风滑雨也能歌。

### 访小石源李兄别业

筑得杨岐一壑深，故人庭院绕成林。篱笆黄犬皆迎客，洞府珠泉惯濯心。把卷应开昏世眼，听禽遥许碧松音。春来雅集诗江右，唤酒风流要唱吟。

### 柳堂（长沙）

#### 山花子

**序：**丁亥谷雨次日，江右诗社、居庸诗社诸君雅集萍乡上栗小石源，星城宋玉、心魔、意而、孟蓉及予，受汝启兄之邀与焉，得以重会抱瓶老人、水击三千等萍乡诗友，并首次得会仰斋、一得愚生、殊熠在天、吴金水、剧饮千杯、剑川、剑尘、紫藤、皎月等多位知名却未曾晤面之诗友。幸甚至哉！赋小词一阙记之。

上栗花开四月馨，随车来访更新晴。江右风流多雅韵，见精英。    薯酒复浇龙猛笔，石街长接赣湘情。沉醉暮归犹说与、女儿听。

## 剑川

### 江右诗社萍乡年会次汝启兄韵

正是秧针柳线齐，吟鞭西指上杨岐。龙渊此地潜鳞甲，  
鸿爪今朝印雪泥。剧饮千杯应我待，快谈竟夕复何辞。相  
逢萍水生新趣，处处河山细品题。

## 剑尘

### 将赴江右诗社萍乡雅集，赋此寄意

已嗟花事等闲过，谁绾幽怀到薜萝。浊世陆沉春欲老，  
繁灯影惯梦无多。未能一席麾江海，聊缔三生问笠蓑。小  
石源中明日会，应倾石髓酒池波。

### 小石源雅集次汝启兄韵

嘉居恰与岫云齐，但挹清芬路不岐。遗世高情先种柳，  
醉人野酿自缄泥。闲凭电信传诗檄，来借岚光养慧辞。风  
雅涪翁存一线，石源春叶好留题。

### 谒文廷式墓

沛然奇气护佳城，风过群山幻正声。一束生刍人似玉，  
百年胡马国何醒。魂兮终幸邻方竹，楚些剧怜随白革。只  
惜胸中千百卷，闲抛沧海掣长鲸。

## 浔阳倦客

### 雅聚步汝启兄小石源韵

小聚石源芳草齐，清吟恰似凤鸣岐。金声玉振标高格，



秀水灵山印雪泥。翠阁风迎南北客，华堂日映短长辞。悬壶更健凌云笔，霁月丹方一道题。

### 车上吟

千里驱驰为识荆，沿途风物走相迎。诚知此聚原非易，今夜连床语到明。

### 方竹

志凌霜雪感心坚，干直枝繁翠接天。检点江南千种竹，只君棱角未磨圆。

### 游孽龙洞

造化生成一处幽，聊凭假日作优游。怎堪顶上多钟乳，稍不弯身就碰头。

### 谒文廷式墓

救世终成一梦空，落花飞絮寄哀鸿。由他不定盖棺论，我到坟前三鞠躬。

### 菜人

#### 依韵奉和汝启兄小石源见邀二首

门外客停车，同来小李家。草莓初结果，豌豆正开花。此是途中见，何为屋后遮？青青满山竹，更不杂蓬芭。

高低凳不齐，坐可见杨歧。别墅据山地，中庭铺水泥。主人招此饮，客我醉何辞？所愧无佳句，向君堂上题。

注：原唱有：“庭前石凳列参差”云云。

## 殊熠在天

### 萍乡小石源雅集次韵江湖小李

最喜今朝才俊齐，不妨随后是临岐。春莺唤友声鸣谷，  
山径迎人雨润泥。庐绕松筠真可羨，杯倾琥珀岂能辞。梦  
魂他日应常到，月下素墙诗满题。

## 虔青草

### 步一得兄韵寄萍乡年会

转眼时光春又初，萍乡聚会欲登车。忽来无奈寒俗事，  
难去空遗憾大如。遥想群儒歌雅兴，却将浅意寄新锄。词  
穷句拙诚心在，何日高朋莅草庐？

## 剧饮千杯

### 萍乡小石源雅集次韵江湖小李

远烟远岫值云齐，若有清声出凤岐。石栅岚光穿笑语，  
村醪香气漉封泥。桃源尽豁春相似，竹影生晕日不辞。倘  
许主人能醉客，鉴亭风物倩谁题。

### 偕江右诸子游萍乡杨岐山谒文芸阁墓有作

遥知此地驻词魂，仄径荒荒宿草蕃。暂借云山开一角，  
长辞帝阙望千门。经年歌哭天方醉，余子风怀语尚温。独  
有新松同壁立，摩碑看字久无言。

## 梅云

### 丁亥暮春昭萍雅集次江湖小李兄韵（进退格）

回春术与缓和齐，退食山房诵克岐。醇酒青横骚客眼，乱花红浥燕巢泥。袂分南浦肠应断，派衍西江责岂辞！问取昭萍今夜月，明年此会更谁题？

**注：**缓和：即医缓、医和，均春秋时秦国名医。克岐：《诗 大雅 生民》：“诞实匍匐，克岐克嶷。”《毛传》：“岐，知意也。”段玉裁《小笺》：“岐者，山之两岐也。心之开明似之，故曰知意。”

### 水龙吟·谒文芸阁墓即用其“落花飞絮茫茫”韵

绿烟低护荒坟，梵钟消尽凄凉意。花飞石罅，鹃啼林表，不知何世。漫拂碑尘，重招词魄，芳春归矣！向空山一啸，清泉四溅，谁人解，松筠志？拔戟西江兀傲，梦惊回、乱鸦声里。青衫泪湿，红椒味永，幽怀无际。萍实潜踪，蕙风盈袖，夕岚横翠。剩苍茫万感，都融落照，伴孤云起。

**注：**朱强邨赞文道希，有“拔戟异军成特起，非关词派有西江。兀傲故无双”句。文芸阁嗜辣，其《鹧鸪天》词云：“堆盘买得迎年菜，但喜红椒一味辛”。

## 皎月（女）

### 访小石源步汝启兄韵

平莽浮烟远树齐，东君行迹滞杨岐。春风着意吹红粉，柳絮无声堕紫泥。山接楼台犹共倚，酒开怀抱不须辞。我今亦有从容句，欲趁微醺柱上题。

### 江右居庸两社雅聚小石源

主人置酒远相迎，宅倚重峦秀竹清。金谷琴樽知味雅，兰亭笔墨落尘轻。留连诗国浑如梦，坐并春风欲忘名。恨不须眉生此世，筵前亦效玉山倾。

### 谒文廷式墓

腐叶深深掩墓门，高林寂寞自晨昏。烟岚似织平生恨，书剑空承国士恩。几许残春留晚照，数声啼鸟吊孤魂。青山纵肯容高卧，犹自云中望帝阍。

### 清角吹寒（湖北，现居广东）

#### 小石源诗会未能参与，步江湖小李韵助兴

邀得网坛人物齐，清吟胜似凤鸣岐。天逢谷雨春相会，窗动竹风花入泥。恼我对山徒仰羨，劝君遇酒莫推辞。今宵做个江西梦，小石源中诗共题。

今日风熏共酒醺，醅醖一架正纷纭。暮春至此人初会，大雅于斯声可闻。欲借诗词兴网络，更扬国学立功勋。归来坛上还相聚，不再朦胧似隔云。

栗水岸边杨柳斜，粉墙青瓦绿篱笆。车行百里同搜句，桌摆两围先泡茶。席上交杯心契阔，屏中对面语咨嗟。来年携手清风夜，共忆案山新月牙。

### 深南大道（湖南，现居广东）

#### 役职鹏城闻长沙诗友聚小石源有寄

夜发浏阳访戴舟，遥闻湘赣聚诗俦。石源三径缘溪到，醪醴千坛为客留。烂醉何妨言艾艾，相邀不计路悠悠。铃

声仄案俛惊梦，身在罍城十八楼。

紫藤（女）

小石源雅集次韵汝启兄

思绪翔天与鹤齐，春风送我上杨岐。云披皎月光含露，雨过苍筠笋出泥。雅客温言添暖意，华堂翰墨出新辞。石源激起千珠趣，洒向诗坛字字题。

楚成

江右诗社周年雅聚，因公务不能至，次韵小李兄以寄诸君

故园遥念故人齐，恨我征程分路岐。小石源中听谷雨，楚天台下踏春泥。萦怀万事那抛得，斗酒千樽准不辞。谁道萍乡萍水聚，群贤争向此乡题。

虞某人（景德镇）

次韵一得兄寄江右诗社萍乡诗会

喜遇康乾德政初，华堂引驻四方车。三春好景收难及，一己闲愁付阙如。遥借萍乡时令雨，来添菜地苦辛锄。羨君雅集龙兴界，我亦悠然得望庐。

意而（女，长沙）

序：乙亥季春，谷雨当节，宋、柳、魔诸兄携意而驱车至上栗小石源。值鸿儒荟萃，余竟叨陪末座，幸甚矣哉。归来摘句，并谢汝启先生盛饌以延，镇南前辈薯酒相劝，墨竹大师墨宝惠赐，抱瓶老人谏言垂训。

三月桐花路，萍乡楚客来。不辞仙境远，幽径为余开。  
迎宾黄犬并黄口，可意绿茶在绿斋。此地桃源不姓陶，夫子风流惟德高。竹荫深处隐文曲，群贤觞溢为吟骚。江右湖湘才气足，中原京上亦多骄。诗兴不分南与北，建安清发在今朝。谁研暖香墨？谁画竹枝阔？一笔一深情，字字皆绰约。山风袭我酒力增，欲拾浮云愧才轻。始悔从前蛙目浅，鉴亭原信是兰亭。久绊红尘百事嫌，书台寂寞已经年。归去依依长太息，愿同嵇阮醉而癫。人生得斯知友二三子，不恨别离车马喧。

### 颖庐（女）

#### 江右诗社周年庆典未克躬贺长句遥申向往

何处高吟将梦撩？连翩诸子馭神雕。弥天花气春无缝，拍岸歌声江沸潮。鼓舞吾能吹一呬，磋摩谁不袖千瑶。回舟亟采蘅兰佩，好寄湘东云路遥。

**注：**龚定庵句“靡芜迢老春无缝，蕙苒逸成泪有痕”。呬，以口吹物发出细声，以喻微弱不足道。《庄子·则阳》：“道尧舜于戴晋人之前，譬犹一呬也。”

### 鄱湖渔歌

#### 萍乡谷雨聚会作业 次韵江湖小李

青峰万仞与天齐，千里从游路不歧。杜宇啾啁鸣谷雨，春花殷轸化红泥。山泉泽润清能濯，庄主谊深安可辞。难得石源标秀会，一般诗句百般题。

## 一得愚生（20首）

陈忠平，字半愚，别署鄱湖野人，1965年生，江西都昌人

### 丁亥中元后夜月食

人鬼一团圆，旋又隔渺茫。思之不能绝，梦之不能长。  
天亦有情天，何忍照断肠。故遣地为蚕，食此月之光。

### 读陶诗应江右月课，韵限八庚

徙倚深云里，而能邈世情。乾坤同醒醉，草木自衰荣。  
岁熟三餐足，心闲万籁清。桃源随处有，五柳不重生。

### 夏夜散步即景

劳歌如未息，镭射舞衣红。透湿非关雨，狂摇何必风。  
夜为情烤热，梦被酒淘空。我且步荒径，悠然思不穷。

### 再寄龙溪上人

闻道林深处，苍髯盘石根。菩提自然净，贝叶不须翻。  
壶煮青溪月，云浮绿蚁罇。清风寒有味，奚与世人言。

### 出户

出户门轻掩，微凉开素襟。风清催叶暗，月懒卧云深。  
小径容方步，幽虫可共吟。谁言不成调，领略在吾心。

### 寤枕

寤枕非关梦，呵窗清气凝。夜凉初可觉，衣薄略难胜。

万里隔云路，秋心怯一灯。嗜之惟此网，聊以忆吾曾。

### 早春行

村墟疏我久，竟不信春回。一点镜心皱，千山情窦开。  
微风暖筋骨，晓雾湿尘埃。徐步轻撩袂，沿途尽落梅。

### 偶感

情愁无可寄，踟躅老诗心。一语盘空瘦，经年压梦深。  
我生於盛世，所慕在高岑。风露呼为酒，横骑五色禽。

### 中 秋

何独怜今夜，一年容易秋。雁都为过客，月只照离忧。  
寒露洗檐白，心潮到海休。清风扶薄醉，倚断小洋楼。

### 闷热之极，忽有凉雨至，原来醉后一梦

池塘殊浅浅，草与乱荷平。水鸟潜无影，山云卷有声。  
雨携清韵至，凉夹晚风生。好梦如能再，何妨拥酒城。

### 月夜独酌

谁与同消万古愁。且邀明月共登楼。三杯浑忘人前矮，  
一卒偏怀天下忧。文事凋零悲浊世，人情冷暖叹凉秋。羲  
皇借我摩云翅，飞越蓬瀛也醉眸。

### 偕凤凰山主一行登南山，山下鱼馆置酒

把臂南山秋画图。清风脚下起徐徐。摩挲残字追高古，  
指点苍波认远墟。语可推心缘不薄，诗能佐酒醉何如。斯



时一别休惆怅，我有河鱼子有车。

### 咏秋云赠云弟

夕阳渐欲敛其华。半坠犹悬散绮霞。残絮千堆风扫乱，轻烟一缕雁拖斜。倩谁能把锦书寄，底事偏将片月遮。化作秋声浸寒笛，随侬晓梦到天涯。

### 无题

拟试新醅谁肯陪。生生倚断旧楼台。方疑塞雁传书至，忽见罗衣牵梦来。残月应知别后意，遐思尽托掌中杯。我心恰似疏篱菊，一着霜风便自开。

### 忆故园小住

故园久别此盘桓。散罢乡亲兴未阑。坐领月华书可读，卧听天籁俗能禅。殊无大任劳筋骨，别有微凉到肺肝。谁复红尘说稽误，白云生处一庐闲。

### 为学友二十周年集会作(三首选一)

别后匆匆二十年。相邀就酒桂花天。洗蟾白露寒初透，着镜清霜剧可怜。执手翻疑一场梦，知心尚剩半生缘。灭灯忍看西风起，吹散飘蓬各自边。

### 无以为题(三首选二)

风流无复忆当年。吐角锋芒一黯然。世味渐知横眼后，春心半老落花前。手敲电脑天非远，竹掩蓬门地已偏。耽癖未妨三径冷，随栽桃李各争妍。

一卷诗轻万贯钱。自娱自乐自陶然。有梅挂壁宜高咏，  
无客登门合早眠。往事萦怀人可梦，清风入抱句能弦。吟  
魂不共青衫老，除却二毛仍少年。

### 初夏偶感

弄柳莺馀二月歌。悄然暑逼懒人窝。难从网络消长昼，  
欲借清凉到碧柯。卜雨问云云不语，枕书寻梦梦如何。最  
怜蚊蚋俱成器，尘世喧嚣渐次多。

### 夜读雨如诗感而寄之

世象纷繁嗟未休。况乎近在御城陬。挽弓谁肯射颡日，  
触忌君当惜转喉。一事难安宜自乐，三餐能饱更何忧。且  
看明月闲窗外，亘古如磐挂顶头。

## 天堂有鸟（10首）

邱邑金，字亦军，号木生，1959年生，江西南康人，现居南昌

### 跌水沟野趣

秋游未必攀峰顶，听水偷风歇竹亭。板凳四条拼一梦，觉来尤效卧龙鸣。

### 鬼节回乡杂咏三

久迨中元至，回乡祭考妣。灵龕尘未掸，漏屋灶无炊。纸器冥钞化，心香烛泪垂。坟前思再孝，空恨草离离。

### 意外蓬莱

古传徐福寻丹处，却是海边一乱礁。桥畔小摊拉过客，山头褐石树航标。环游不见祥云瑞，坠日顿扬黑浪飙。倘若神人今健在，嗟乎仙境已承包。

### 厦门金榜山

鹭岛西南有石山，晨间老幼喜登攀。葳蕤三角梅如火，蓬勃木棉树耀丹。俯仰峰林天际远，缭绕仙籁海云宽。两陈班驳遗碑在，一为愁肠二胆肝。

注：两陈，一为陈黯，屡试不第而退隐于此；二为抗英名将陈化成墓。

### 重阳登厦门万石山

秋逼霜天乱绪飞，登高远望趁熹微。葳蕤花树香无际，萃确峰山乐不归。已逝高堂愁白发，何言寸草报春晖。去年九九音容在，今又重阳泪湿衣。

### 游梅岭铜源峡

一路寻来几落空，仄回崖下景无穷。宋公天物插图里，古碓地藏峡涧中。流枕一川赋诗画，石呈千古颂雅风。多情应笑诸夫子，日暮犹思咏彩虹。

### 浣溪纱·厦门记游天竺山四首

林场当年继系难，顺时辟作旅人观，想来此地不宜玩。跃上葱龙低闹市，萦回绿海近楞杉，人间风景贵天然。

云顶凌霄午日寒，山腰游客似猿攀，登高好望海沧宽。深壑清幽真寂寺，祥云璲璲鹤松蟠。西方天竺在此间。

苔径荆门入紫烟，千竿翠色少人怜，不妨小坐胜神仙。壁挂一泉娇滴滴，路铺百卉色娟娟，谁人此际不留连。

不觉衣凉日已偏，好风送我下西川，迷路桃源亦新鲜。乡墅楼前蕉叶绿，小村山后荔枝园，闽农日子乐斯阡。

## 云中鸾（20首）

王小娟（女），1971年生，江苏南通人

### 过桥

怡桥之下水泱泱，怡桥之上车玳玳。大手挽着小手走，风串珠语脆生生。妈妈左脚迈一步，女儿左脚着地轻。妈妈右脚迈一步，女儿右脚疾趋行。左脚右脚频交替，大手小手相交并。晏晏一笑过桥去，桥头石狮久送迎。

### 忆楚成兄

燕京高会后，始识白眉人。秋惠香山叶，樽空古郡尘。痴怀成远契，偶聚得长亲。况是维舟水，重湖相见频。

### 有所思

人道秋华好，枝头丹气欣。不知风起处，更有雁呼群。依旧深林立，翻思故友勤。采柑添怅怅，往事水天云。

### 松门洞下沙滩

人向嵒峣望策勋，我来洞下荡胸云。山从波影青时长，水到风林绿处分。已讶渚华滩上灼，更摩沙粒掌中纹。江城节物多相似，只是轻歌久不闻。

### 雷雨

一望烟树接云浓，惴惴时惊飒飒风。石破初疑天漏底，河倾翻恐陆沉中。果听挝鼓催飞矢，疾下郊原扫落红。自叹区区英气减，且收失箸慰娇童。

### 赠病夫兄

交交花影早成尘，大小葱犹郁郁身。朝露掇来十分玉，  
青衣裁作一畦春。每因月出犹思伴，岂著风高不择邻。今  
向西园标卓犖，芸芸行迹最相亲。

注：在诗词总汇网站偶添马甲“小葱”，病夫兄另置马甲“大葱”，  
虽无橘中乐，亦多网间趣。

### 算盘

纵担帷幄运筹名，还向梁间仔细行。一带档珠难左右，  
四围丘壑隐峥嵘。浮沉岂是心中意，恩怨由来指下清。却  
被风尖人物笑，于圆滑处度生平。

### 旗

飘飘之处类豪雄，镇日痴痴悬半空。未必挺腰旋定所，  
居然挥舞只因风。浮沉身合尘埃附，操纵人矜控术工。我  
立清秋难出手，聊哼一曲太阳红。

### 狗

已列仙班吠白云，因秋逐兔出东门。填肠那得生鲜味，  
添食惟劳破瓦盆。堪惜扬雄老投阁，何如平子早归村。丧  
家犹是无人喻，况复天边旧梦痕。

### 虞美人·修复苏小小墓

绿杨折矣何消说，不绾同心结。经年无觅慕才亭，空  
剩濛濛烟雨锁西泠。一弯凉月生南浦，艳迹传千古。  
堪叹名士谩风流，对著六朝香粉竟含羞。

鹧鸪天·次力夫先生韵寄京华诸君子

长记红花席上斟，京华君子发高吟。赋成叉手相青眼，情到忘形只素心。诗韵窄，酒杯深。天涯无处不知音。兹时虽隔云千里，一例氤氲醉到今。

注：红花——红花酒。

临江仙·回母校监考

一踏浮云惊十载，此身又到窗旁。纷飞思绪触铃铛。师生同肃默，考卷各铺张。皆是塔中来去客，何时老却颠狂？当年我亦读书郎。偶然抬眼望，有鸟远飞翔。

玉楼春·赠燕子

小区大门厅顶处竟有对燕子垒巢，休说是女儿，我也是第一次见。偶得闲暇，逗留良久，似是旧识般。

天涯哪是侬归处？一夜春来红满树。争将几许绿杨丝，衔向画堂帘下舞。经年休惜无亲故，且认繁花随意住。稚儿拍手笑相呼，惊却呢喃双燕乳。

永遇乐

上元日风寒料峭，街心某店独坐，忆人音书全无已有一年矣，兼步零落一身秋韵

输却云烟，飘来风雨，三月滋味。纵使街心，更兼眼角，皆是望春意。痴魂掬起，生啤泡沫，消受那时沉醉。隔年事，心头流淌，依然温润如水。当年颊晕，当年眉妩，得问他人记未？渺渺吟怀，盈盈清泪，寄也无从寄。南徐道里，米家山上，依旧菜花香细。思量遍，芳菲著处，与谁折矣？

### 水龙吟·莲

纤裳不觉轻寒，殢娇无语湖烟里。红阑枕水，玉盘擎梦，鸳鸯同睡。几度销凝，凌波凉月，盈眸湿翠。忽流萤承露，冶姿褪粉，浑不见，前时媚。一夜六郎憔悴。卷珠帘，背人斜倚。风铃微动，依稀听取，莲华真谛。叶叶生时，相逢倾盖，与归尘世。待绿云影里，雁声坠处，掬清香细。

### 水调歌头·引航员之歌

歌揖五山去，最爱我长江。矫龙游走南北，飞浪竞腾光。晓日风云浩荡，入夜星辰俯仰，邀约我徜徉。更激万堆雪，熠熠耀肩章。国门阔，港口兴，碧波长。手边雷达，何事犹自不停忙？指引蓝天高鸟，穿越黄金水道，共与铸辉煌。待得月明处，潮阵接银潢。

### 满江红·京口北固怀稼轩

落日孤圆。眺望处，云如走马。休再说，刘郎才气，美芹声价。引剑能安天地事，凭栏早与风雷咤。惜生子，终是类仲谋，居人下。南北恨，长江跨。烽火路，扬州夜。问千秋词笔，后来谁亚？第一楼头鸥梦冷，佛狸祠下鸦声寡。剩周遭，江水向东流，空潮打。

### 高阳台·双双燕

悄合芹泥，娇分翠尾，双双影渡波寒。忽响惊弦，无端折羽桥前。蓬莱已是盈盈指，奈参差，不到三山。晚难寻，偎暖圆沙，叠水春船。繁星数到三更鼓，仍萤灯



隔梦，蝶影飞闲。欲不思量，思量尤被心难。怨魂一缕归何处，倩朱纓，丝系巢边？怕来年，絮又沾帘，烟又浮栏。

沁园春·婺源村庄

谷雨时分，地母怀中，沉睡村庄。念补天岁月，那么遥远，乡居生活，如此芬香。飘渺晨曦，朦胧黛影，一缕霞光看渐长。心萦处，忽牛铃搅雾，犊子牵黄。 娇娘拾缀明珰。三五伴，伶俜过碧塘。值毛尖着露，仙枝着蜜，婺源流指，婺源流筐。响脆林泉，应声树叶，并作南来风味凉。神怡久，转思量城市，为底繁忙？

貂裘换酒·大连官邸代夫宴赠大学李姓同学

屈指应惊诧。算而今，已然过了，十多春夏。犹记当年风华茂，胸次平湖走马。亦记得，樱花树下，枕手清凉听风落，把娇红，装饰青春画。几思忆，不曾罢。 貂裘换酒能飞罽？渐长街，市声止沸，倦灯幽挂。回望窗前微雨歇，依旧尘帘低亚。休与说，心仍狂野。但嘱杯盘收拾去，饮些茶，再续家常话。值此夜，月华泻。

## 云海（18首）

李真龙，1954年生，江西南昌人

### 初中毕业书怀（用陆游韵）

早岁初知世事艰，人生本有万重山。一身但得微微饱，  
两字须当谨谨关。毕业未成廊庙器，年华断送鬓毛斑。孤  
灯且读出师表，莫问茅庐第几间。

### 首次异乡过中秋节

茅舍中秋朗照临，良辰美景酒频斟。团圆正享升平乐，  
歌舞方传尧舜音。玉笛谁家当月弄，幽怀何处向风吟。天  
涯此日飞蓬转，山水焉知少壮心。

### 定亲纪念

铁锻农磨霜雪侵，笋尖仍破冻泥深。自然须发衣冠剑，  
天下媒人父母心。一样农家无贵贱，永盟鱼水结知音。不  
求貌美心灵美，红袖添香比翼禽。

### 校园月夜吟

漂泊穷乡几度秋，铁炉锻炼少年头。每过校舍心先痛，  
一听书声泪暗流。两地相思千里月，九重谁念五湖舟？而  
今我亦攻关去，魂梦清风忆旧游。

### 漫兴

波影寒摇瘦影长，落花无语立斜阳。休言改革机同遇，  
不肯夤缘事独黄。志士匡时心易热，男儿报国血难凉。徘

徊楼上三更静，听彻荒鸡破晓霜。

### 遣怀

驷马高车意态闲，豺狼当道劝君还。斗筲谁解心千里？  
诗酒何妨棹九湾。影瘦南湖春水咽，花残北岸暮云寒。男  
儿莫洒相思泪，且向人吟蜀道难。

### 岷山亭

春风二月岷山亭，雾散岚清宿雨晴。旭日开天云乍展，  
轻舟击浪水初明。缄书欲寄沙边雁，解语还邀柳外莺。儒  
将遥思羊叔子，龙泉夜夜匣中鸣。

### 中秋即席

老杜秋风感慨多，人虽铁石不经磨。落花满地诗如此，  
白发一茎愁奈何。夙志中兴期奉献，躬逢改革正蹉跎。潇  
潇细雨潜潜泪，桂殿无声子夜歌。

### 正月初一感怀

平生肝胆运难齐，前度刘郎未敢题。志大才疏原自误，  
春风秋月等闲提。绮筵交赞肥羊质，古道空驰瘦马蹄。唯  
有书生情不改，赤心一片系苍黎。

### 农大毕业十二年纪念

未有经纶不世才，涓埃报国是吾怀。死图形像凌烟阁，  
生着功勋拜将台。尽意为公倾肺腑，掬心作吏绝尘霾。规  
模改革终成幻，把酒空吟归去来。

## 谷雨

清明谷雨艳阳天，芳草萋萋腾绿烟。度柳轻风才舞袖，绕桃流水又歌弦。莺声总共泉声滑，花影还同蝶影翻。双燕衔泥巢共垒，岷山岚水足流连。

## 过渔家

晚霞染透远方山，鸟自飞回人自还。帆影依稀归柳浦，渔歌断续入芦湾。老翁奉酒杯犹暖，小犬牵衣爪欲攀。灯下粗茶相对语，浑忘碌碌鬓初斑。

## 感怀

青衫瘦影送年年，又见霜飞鬓两边。只有痴心伤酒后，断无傲骨折人前。升迁昔日常夤夜，报效如今硬要钱。若是囊中无个子，虽营科级也登天。

## 登滕王阁

高阁披襟浩气盈，男儿书剑重横行。凭栏目极江鸥远，把酒歌招白鹭盟。谁似子安传一序？我来秋水去无声。诸君莫问登临意，热血满腔济太平。

## 雨晴垂钓

烟雨蒙蒙花雨纷，湖光潋滟钓晴雯。滩头执着凭争草，溪上随缘不逐群。袋里无鱼方落日，胸中有句未成文。谁惊野鸟腾清浪？却借东风上紫云。

### 生辰

三阳开泰岁平宁，把酒谆谆侧耳听。马瘦毛长犹蹭蹬，羊肥皮暖自温馨。芳华梦里霜初白，宝剑炉中火未青。廊庙牙签清器满，无烦多少一乡丁。

### 登黄山莲花峰用温飞卿韵

脚踏莲花日隐晖，黄山万岭雾霏微。仙人胜迹真谁见？夫子游踪此处归。雷动九重惊蛰起，云开一剑看雄飞。诸君改革闲贻我，好在林泉不蕴机。

### 浪淘沙慢·春夜吹箫

远山静，波心荡影，树顶筛月。春夜寒辉映雪，谁家玉管欲裂。恰正是幽凄惊落叶，更摇曳，宛转林樾。漫问讯，谁堪伴歌舞，孤影郁千结。    呜咽，黯凝玉宇琼阙。忆执手兰舟烟波阔，洒泪同滴血。知古往今来，唯有离别。渭城歌歇，思故人，西望阳关空热。凭尔阳关歌三叠，难堪比，隐微曲折。最逗起，奔波寒暑铁。叹知命，命岂能知，曲既尽，无眠待与何人说？

## 水击三千（15首）

梅岗，1972年生，江西萍乡人

### 夜宿三山

夜宿三山枕石风，一轮明月照窗栊。繁华远隔苍峦外，  
只有流泉入梦中。

### 除夕

长街灯火信无前，彻夜繁华合独眠。总是人情参不透，  
茶香袅袅续流年。

灯火燃残岁，高楼独自欢。悠悠心欲静，渺渺雪犹寒。  
不解来生苦，焉知行路难。卅年尘未扫，所幸是平安。

### 闲坐

闲坐长街上，行人如水过。浮生几故识，沧海一沉柯。  
花落堪谁惜？倾杯当自歌。蓦然西北望，天际白云多。

### 题象湖宴兼留别

临湖开野宴，兴至饮无巡。欲卷千层浪，先斟四面春。  
风流入醉眼，花落满烟津。惜别思题句，不如柳色新。

### 凤栖庭树

有凤栖庭树，其声闻九天。哀哀久不息，上下复盘旋。  
往世成追忆，来生又何焉。逝将归太宇，太宇或堪怜。

### 天星岩

欲出浮尘去，将身缥缈中。流泉响云外，古木落残红。  
旧屐无人拾，菩提何处空。不知禅院里，可有径相通。

### 登滕王阁

清秋游故郡，独上九重天。危阁凌虚淼，孤帆入邈然。  
高情终古逝，帝子复谁怜。怅望斜阳处，连山起暮烟。

### 依石结泉庐

卜居壁山下，依石结泉庐。云冷杉松翠，径斜花药疏。  
荒鸡鸣岭上，闲犬卧阶除。独坐斜阳里，心澄接太虚。

### 读红楼有感

人生终幻灭，一去复谁归。亲识劳相念，幽情奈已违。  
阳台歌邈邈，秋水梦依稀。明月清风里，蛛尘掩故扉。

### 高台

高台怅望久，山水漫清愁。叶落长潭柳，波沉古塔秋。  
人生岂如意，幽思自难休。忆及当初事，烟迷江上州。

### 南天

南天不可望，一望断人肠。久去音犹渺，相思日以长。  
烟波沉晚照，飞鸟入迷茫。江上华灯早，斯心悲未央。

### 为沙老寿

久卧蓬庐心若水，南山欲赋竟无辞。故持素酒遥相祝，

漫对停云有所思。昔日从游留旧履，今生重逢是何时？阶前但怅东风晚，未有寒梅供折枝。

### 无解

既知存世尽辛酸，行迹渐空心渐宽。一带高楼相去远，半壶老酒自成欢。苍云漫卷寒山外，黄鸟闲鸣古木端。尘劫三千谁解得，梵经但与醉中看。

### 登楚王台

恰逢胜日谒昭王，栗水初平草木芳。石上青萝遮断壁，林间幽鸟泣残阳。千年剑气今犹在，一带戍台时已荒。惟有云深遗旧祀，轻烟袅袅入苍茫。



## 东华人氏（15首）

陈建福，1956年生于江西抚州，祖籍山东沂南，现居南昌

### 游子吟（二选一）

雨叩纱窗客梦惊，依稀老母唤儿声。江南回首双双泪，  
白发应从两地生。

### 咏志

学律无成好作诗，镇天粘对仄平词。余生尚有十年健，  
不信锋芒未有时。

### 杂感（二十选一）

白发吟哦无雅句，黄莺婉啭总怡神。牵情又到春三月，  
南北桃花忆故人。

### 春望

山茶初破蕊，碧草已连天。嫩柳随君舞，杜鹃为我燃。  
才离湖水岸，又上塔峰巅。放眼江山外，飘然几欲仙。

### 仲春游滕王阁即兴

征花载酒行，满目是新晴。南浦轻舟渡，西山紫气生。  
洪都春色好，高阁客知名。笔墨留连处，临江赋月盈。

### 野钓

野钓寻真趣，荒郊足迹疏。持竿而闭目，屏气以凌虚。

古驿花谁赏？横塘柳自舒。半边云散后，尘念顿时除。

### 自题（二选一）

我本书生意气昂，穷途未改性清狂。抬头只为歌吟远，挥泪无非爱恨长。锦瑟年华逐流水，银屏声影伴孤床。惜身已弃功名累，蜡尽灰余诗万行。

### 酒后感怀

人间春恨古来长，几载天涯两鬓霜。仰慕仙山云海远，心怀旧事感情伤。衣衫浊气频醺醉，肺腑韬光日渐扬。文弱书生多落魄，青灯照我赋诗忙。

### 咏春

春光一泄暖融融，小苑山茶点点红。啼啭莺声闻不断，婆娑柳翠韵无穷。溪流涧水来天外，蝶闹群芳曲径通。我有闲情谁与共？几分得意几分空。

### 感时

池边桃李又迎春，岁月消磨叹五旬。往昔凌云酬壮志，而今伏枥困风尘。飘零闻笛心生感，害病歌吟意隐沦。好在功名非我愿，书生自喜一儒巾。

### 登山

杖藜人在谷中行，时有红鹃峭壁生。汨汨清泉溪曲送，巍巍绝顶雁长鸣。峰高已是游人少，云重浑如海浪倾。攀到与天连接处，方知万里绽春晴。

阮郎归·人生旅途

春来水暖客知先，东风又鼓帆。鹏程万里俯云端，迷雾满川。临古渡，望家山，黄昏闻杜鹃。乡音追梦到阳关，问君何日还？

采桑子·凭吊古战场

桃花付与春江水，脂染流红。燕子楼东，玉砌雕栏落照中。凭高莫动伤怀泪，千古英雄，草没荒冢，断碣依稀记战功。

忆秦娥·春深处

春深处，算来好景应无数。应无数。等闲相看，落红飞去。东风漫奏群芳谱，花间彩蝶婵娟舞。婵娟舞。有销魂者，正愁春暮。

卜算子·桐花落后春将瘦

暗雨落桐花，莫问春归处。南浦飞云古渡头，渺渺烟波路。昨梦武陵源，已是花期误。客作青山白发吟，谁解飘零句？

## 仰斋（20首）

傅义，1923年生，江西丰城人，现居宜春

### 古柏行

马祖庵中二株柏，祖师开山手亲植。人间风雨越千年，琳宇废兴几经历！今惟巨柱挺晴空，旧诚易破新难立。古柏巍然俯残棋，默无一语长叹息。菩提空羡悄无踪，中华良种永犹龙。龙钟不改凌云势，神力难追造化功。伟干凝重如隆阜，高枝摇碧傲东风。三生因果思维外，八极风云指顾中。香叶久无鸾凤宿，古遗犹令人肃穆。一株中洞沃泥浆，不许风霜侵大腹。一株磬折若朝参，钢架扶持添劲足。吾儒自昔爱甘棠，心向往之目未瞩。我向伟材三顶礼，庆幸峻嶒今犹矗。

### 桃花

梦里仙源入未成，缤纷满路枉多情。可怜原是瑶台种，却得人间轻薄名。

\*杜甫《漫兴》：“轻薄桃花逐水流”

### 荷花

不似春闺粉黛香，生成姣好却昂扬。污泥不染真君子，反被深宫比六郎。

### 夕阳

一身遍历万沧桑，曾是朝阳今夕阳。渐近崦嵫芒角敛，却如新沐特辉光。

### 柳岸散步

俯视清流韵最骄，火云回避柳千条。绿荫沿路昂藏过，我不低头他折腰。

### 窗前枯木复荣

不自甘衰朽，心仍鼎盛时。闲情友花鸟，清韵化诗词。削玉亭亭影，干云矫矫姿。与君数晨夕，浑忘发成丝。

### 空调

性聪知冷暖，体贴最殷勤。颇得主人爱，亦令宾客欣。职甘同犬马，力可馭风云。不自矜功绩，何人似此君。

### 闲居

杜诗韩笔尽珠玑，蜗角蝇头魅影微。不入青山仍习静，只应白首便忘机。月移清荫潜侵枕，花纵芳香乱入帏。自省尚无禅定力，借摊书卷闾心扉。

### 自遣

朝夕开帷纳彩霞，和风也请入吾家。远师陶侃闲移臂，懒乞羲和暂驻车。顾影未生鸿鹄翼，踏春且赏李桃花。临窗试读相如赋，快意凌云一霎遐。

### 谒韩文公祠

朝阳影里见潮阳，来谒阶前一炷香。不信文能祛鳄患，仍钦心是恤民伤。丹花艳发英雄树，碧磴遥升泰斗堂。八

月仁风千载被，山川同戴日星光。

### 布衣步丁小玲韵

草茅尘少未缁衣，嘘壁还思气吐霓。瘦误人称身似鹤，老真自翮发成丝。飞觞醉月慵呼侣，安步徐行漫咏诗。忽见幽兰空谷韵，清芬徒挹笔难题。

### 端午吊屈原

读罢离骚剩感伤，圣贤难慰九回肠。江山有主尊孤独，天地生才吊败亡。浪涌汨罗千古恨，盘堆角黍万家香。却怜言者闻无罪，犹道君王是哲王。

### 野读

秋光诱我挟书游，坐读行吟未肯休。红叶拾来书小字，黄花开处发清讴。有风辄向心头触，得句全随意识流。下里阳春忽忘却，海天飞下一群鸥。

### 安居

寂寞山城居易安，园蔬新擷可加餐。花能侑酒微微醉，风促添衣渐渐寒。已老未衰堪自喜，既温且饱幸无难。中年哀乐休回首，姑作烟云梦寐观。

### 徐绚老友读予仰斋存稿见怀赋此答之

坑灰渐冷复长哦，历劫翻成雅兴多。夕秀朝华顾予笑，雷鸣风啸助人歌。倘能中律惊神鬼，不怨贪吟陷网罗。壮岁英怀宁足道，且揩老眼看山河。

### 温汤冬浴

畅享真成入小康，解衣盘礴水晶床。不知留恋于何处，只觉温柔是此乡。击浪风云生羽翼，驰神烟雨濯沧浪。迷蒙那省愁滋味，户外寒流任自狂。

### 生查子·临屏致林清晓

相识白云乡，笔下瞻风采。。又向菊斋逢，岂必韩阶拜。云外七弦琴，入耳成天籁。忽觉月明中，漱玉依然在。

### 浣溪沙·寄丁小玲君

曲岸垂杨绿影斜，田田荷盖拥荷花。绝无尘垢正繁华。桂楫悠然休击浪，菱歌轻些莫颈鸦。有人正谱浣溪沙。

玉树兰阶道韞家，倚声最喜浣溪沙。铺成文锦灿于霞。纤手织愁还织梦，素心如月亦如花。幽窗风韵乐清嘉。

### 鹧鸪天·晋城道中

不畏风尘白发侵，飞车横野复扪参。纵穿地脉几无间，才见天光忽又阴。山络绎，洞幽深。崖危径仄气萧森。凭窗偏爱观奇险，履险如夷最称心。

## 向闲（19首）

卢象贤，1963年生，江西修水人，现居九江

### 获“喜敦庐山杯”围棋赛亚军及最佳晋级奖

携将百余兵，鏖战十九路。大略徐徐展，疑阵轻轻布。  
弈理如人生，内中多变数。无水有风波，无山生迷雾。角  
小机关多，边薄神难戍。腹大易落空，津狭能存渡。坚实  
总逢源，失伴成孤鹜。艺高无胜算，多被贪心误。名曰输  
一盘，实则输一步。已无好胜心，翻得其中趣。

### 槩

到长青药店购盐酸小槩碱片，老店员谓系其平生接待之唯一说  
对此种药名顾客

由来苦乐伴人行，岂是存心记药名。乐府诗中读黄槩，  
一观此字即心惊。

### 理发有感

世上谁人见自身？镜中反相亦非真。发肤筋骨时时变，  
来是生灵去是尘。

### 游毛贺成婚地象山庵

志远男儿藐鬼神，深情山女祈子珍。无言池水依然在，  
曾照当年异梦人。

### 四十一周岁生日

半生已付东流水，留得童心似那年。对饮山妻休看鬓，



平安一日即神仙。

### 网友索句(五首)

#### 晓雨微寒

晓来啼鸟未闻声，雨打芭蕉意不平。微有些些残梦在，寒窗远眺望新晴。

#### 狂醉卿卿

狂歌接輿有来人，醉里千般认不真。卿若有情卿亦老，卿如无恨早成神。

#### 拂手为云

拂去浮尘往事多，袖边酒渍似沉疴。为君上寿遥遥祝，云水茫茫且作歌。

#### 倜傥不让须眉

奉诗祝寿胜麻姑，倜傥风流几个如。不让前贤君有志，须眉今笑枉攻书。

#### 竹外疏花

竹叶青青想七贤，外灵内秀始如仙。疏狂本是天生就，花色今年胜去年。

#### 偶题(四首)

诗词歌赋好抒情，峻岭青松把客迎。未识长安柴米价，鄱阳湖内水长清。

剪柳春风漫布烟，栽花高手总徒然。劳心劳力皆堪笑，造物无声只在天。

半生落拓只疏狂，夏雨秋霜莫断肠。好随冬雪骑驴去，峰回路转酒旗扬。

归来风自把门开，梦里横财总不来。老去无聊将网上，人闲月落独登台。

### 左近娱乐城

夜夜红灯亮五更，如潮车马把门盈。克勤克俭今无用，朝舞朝歌古有名。贩毒或能成气候，卖身也不事农耕。衣冠出入多禽兽，岂止丰都是鬼城。

### 悲舟子

近日，有舟子夫妇因交不足保护费，妻被击落鄱阳湖，夫救之，双双罹难。余友渔民夏火星历时二日始将其尸体打捞出水。

出没风波未敢辞，船头盘坐案齐眉。两情恩爱唯鱼见，一世辛劳只月知。鬼若有凭人有劫，生难同日死同时。荧屏莫唱哥呀妹，湖水深深万丈悲。

深湖无物野无薇，自力更生与愿违。船外收钩提瘦月，竿头晒网透斜晖。弯腰驼背谁先富？舞棍持刀盗已肥。水下泥虫啮尸骨，幼儿尚在盼娘归！

### 定风波

独坐屏前但弈棋。冷风透牖夜何其。中局忽然思往事，心碎。枉将黑白逐行题。人世如棋难择路，多误。枝

头残叶不禁飞。读秒声中诸事静，争胜。却无例外是神疲。

### 自制长短句

俱去也，梦醒常恻恻。雄心今在何处？沧海关山，苏南杭北。模糊泪点点，忆旧游，一片伤心色。打点前程，把些剩水残山，重新粉饰。胸中郁闷何时了？休再管、梅弯柏直。数卷读书伴我老，掩心扉，长默默。

## 江湖小李（10首）

李汝启，1964年生，江西萍乡人

### 夜读口占

夜静唯思远，灯昏坐对书。壁间无俗墨，荷叶动双鱼。

### 都市风情竹枝词·老公寄存处

寄物存钱自古同，如今都市更新风。逛街少妇入超市，先向前庭寄老公。

注：如今超市出新招，设老公寄存处，有电视电脑，可以上网，一解决了女人的后顾之忧，二使男有所乐，三商家可以赚钱，一举三得。

### 正月回乡祭祖徘徊于故居不忍离去

流水依墙庭院空，亲栽棕扇舞青青。当年何事轻离别，一度春风一送迎。

### 中秋望月酬津门秋江北美安然两诗妹

念念佳节又，金风次第寒。人隔三地远，月作两回圆。电话劳新贺，菊黄孕故园。何时能聚首，相对道平安。

注：美国与中国因时差13小时，故中秋月作两回圆。

### 自寿答人兼题《小石源集》刊毕（三首选一）

检点浮生半苦甜，怕听风雨感茫然。偏于寒夜怀春梦，惯向银行领月钱。心有难言争富贵，事无不可对苍天。功利磨人勘未破，虚名贪窃又经年。

### 贺水村公寿

远访不嫌草舍寒，石源有幸识公颜。三杯土酿酬青眼，

一席雄谈洞肺肝。别后行踪君记久，文成妙句我删难。遥闻海屋添筹日，诞圣依稀近此间。

湖南诗友鼓瑟湘灵、宋玉、柳堂、霜天晓、心魔访小石源，邀游佛教圣地杨岐宗祖庭杨岐普通寺

难得愁人一破颜，新邀胜友访重岚。残碑字漫湮唐韵，旧庙灯昏读宋禅。汨汨溪声潮子午，纷纷法雨遍东南。江山代谢怀今古，柳上青青送嫩寒。

### 吊楚王台

曾经战阵逐江湖，一页风云散楚图。客自远来凭胜迹，峰从高处指平芜。溪生香芷春还茂，石幻剑痕雪未除。回首荒林遮破庙，苍崖忽又转樵夫！

父逝世于春正月，奉遗命归葬祖坟，忽忽半载有余。于桓儿赴云南上学前夜入梦，将送行乎？文字纪之。

人间生死勘须破，心上亲情舍割难。十里松岗人望月，百年衣彩梦承欢。归来瘦骨存神貌，坐处春风带笑颜。许是行期公早卜，将孙佑送彩云南？！

### 答人（楚韵）

谢君劳问近若何？生计如流同逝波。得意功名来梦外，求人滋味在桌角。已无单位供休老，幸有丘田可种禾。窘态莫传同学晓，当年大话记得么？

注：我们这里把到机关求人办事形象地称为站桌子角，角音哥。

接读《东湖诗词》恰值江南雪后花朝节，遂占一律酬楚成

雪后芳辰宴百花，好音迢递到山家。浓煎万顷东湖碧，酹沏一春谷雨芽。妙句得来云立海，豪情依旧梦吹笳。清明论道滕王阁，椽笔蘸江写岁华！

## 红土川原（8首）

徐忠民，1969年生，江西新建人

### 自题《心灵独步集》

衡岳云开北国风，丹青剑笔为谁雄？海天但许池中物，  
转化鲲鹏跃化龙。

### 新年示诸生诗

东风疑不到荒郊，种树生涯任路遥。付与殷勤一腔血，  
千岩万壑起松涛。

### 初读龚定庵诗

风开衰世随鞭影，哀乐过人字字惊。力失赤鞘凝剑气，  
才成黄卷掩箫声。寺山宁负琅玕册，云月应图骐驎程。我  
爱定公开卷读，天堂月坠日轮行。

### 留别徐迅先生

好雨随风惠远林，乐斋弦拂接芳晨。十年常见金满斗，  
百岁难逢初一春。旧燕泥梁呈物候，新蜩云海问天津。夏  
心争共榴红怒，浩荡离愁不可驯。

### 南乡子·膏粱

底事费思量？积谷防饥久秕糠。稻熟香飘翻浪滚，穰穰。  
未及冬藏已满粮。万恶最膏粱！思痛樊篱誓扫光。故国青灯  
谁独对？囚狂。渐没繁星夜正央。

西江月·鄱阳湖

五水奔流鄱腹，一帆飘荡天心。清风拂面浪粼粼，白鹤远来亲近。湿地犹如肾脏，库容即见胸襟。江西崛起发强音，渔唱也翻新韵。

风入松·纪念程懋筠先生诞辰105周年

洪崖仙子已骖鸾，广乐奏钧天。地灵人杰吾乡誉，想筠公、信美湖山。黄埔训词方岳，救亡歌曲狂澜。生平事业说千端，推教着先鞭。求真求善留佳话，坐春风、毕至群贤。大雅不闻久矣，华堂重抚琴弦。

临江仙·和真龙兄清明词

乍见姓名呼脱口，故人答道身边。心灵感应十三年。众中一握手，客里两陶然。憔悴江干惊岁暮，中宵耿耿难眠。浪抛心力作词仙。际缘虽有定，我命不由天。

## 红叶（10首）

李映斌，1975年生，江西都昌人，现居北京

### 中秋夜月圆有赋

如此良宵不忍眠，朦胧醉眼对长天。此行未有飘零叹，  
月出江山分外圆。

### 社课题鸟

旷野来回自在身，高飞先睹一番春。今朝得意谁同伴？  
俱是尘间闲逸人。

### 题眉子发庐山红叶照

独处林间景自幽，三分烂漫一丛收。风光总是江南好，  
还胜西山几点秋。

### 七夕节

塞外京城信不孤，情深一线系征途。殷勤何独银河鹊，  
缱绻还多今夜吾。借得千山明月色，绘成两地绮思图。多  
情莫说别卿久，料比天仙尚未输。

### 闻水兄同九江诸友相聚押眉字

秋花烂漫挟吟痴，又到浔城绽一枝。试看群山争艳处，  
正逢雅士举杯时。行踪飘逸多新迹，谈兴盎然因旧知。我  
料分襟皆有赋，不教别意锁双眉。



### 约水兄皎月登八大处押红字

漫看秋色一山融，快意登临遣旧衷。高塔远招鸥鹭会，  
群峰近入袖怀笼。岂因迷雾耽吟兴，况有清风洗倦瞳。霜  
叶还知深谊在，坡间断续绽嫣红。

### 岁末寄怀限二冬韵

寒气凝空渐转浓，浮生初度帝城冬。故园有梦迢迢隔，  
胜友如云次第逢。不辞花下成吟客，快意尊前作酒佣。一  
自登楼携手后，纵多羁旅也从容。

### 渔歌来京邀金水伯元二兄共聚分韵得渔字

爽气融融共一庐，他乡携手惬春初。谢君久备洪都酿，  
为我先酣北国居。日下山川天已赐，壶中岁月众能书。故  
溪鲂鮳常萦梦，四月重逢先问渔。

### 清静以一对松石、碧玉手机链见寄答谢

飘摇风絮过千家，飞到长安不似花。北客殷勤思故里，  
玉人绰约寄芳华。玲珑绿透江南水，潋滟红凝岭外霞。纵  
是诗情今渐少，短章犹可到天涯。

### 鹧鸪天·寄邵林兄九月归期将至

关内清风关外楼，望中草木渐凝秋。但教行处添新迹，  
不必吟边动浅愁。山纵隔，水长流。千程山水唤归舟。  
边城自有高情在，莫为殷勤劝客留。

## 抱月斋（18首）

胡剑，字书田，1977年生，江西九江人

### 偶读旧家书有感

检点旧箱笼，家书一地摊。当年信手放，幸未蛀虫残。  
开看无奇语，先自报平安。忧我尘途苦，嘱我力加餐。因  
便传鸡黍，未冷絮冬衫。既期学业就，复恐精力殫。一肩  
担风雨，无字道艰难。我读读不竟，已自泪潸潸。春晖满  
纸润，曾作寻常看！

### 独步清溪畔

独步清溪畔，无风水自凉。深深竹枝影，中有明月觞。  
涓滴流溪上，粼粼不可量。盈盈掬就手，潋滟漾华章。恍  
惚少年客，同坐足如霜。角辫垂肩乱，羞看影成双。泼水  
嗔形近，湿衣复怜郎。褰裳逐鱼乐，翠苻俚人长。撷看碧  
如此，青春一霎狂。回顾十年老，同行若参商。飞鸿流水  
事，那堪复为伤。翻怜无情月，枉悟持盈方。

### 题烟水亭，亭在九江甘棠湖上

湖落碧山隈，亭镶湖镜里。人于亭上行，两袖杂烟水。  
家近双溪水，春来多鸟音。羨伊年来去，自在不离心。山  
溪急雨过，水涨无人知。摇漾参差碧，为谁不自持？

### 珍珠

老蚌无言卧，枯眼无泪行。新得无情砾，堪磨岁月长。

### 中秋堤上玩月兼寄师三首

天宇垂漠漠，一星独摇摇。有月处西隅，入暮自窈窕。

沉沉古玉质，黯黯落虹桥。仿佛无端泪，一滴犹未消。

堤下鸭寮静，堤外水波平。谁家竹马子，偃坐剖新橙。

### 刘太公

生得潜龙子，居然社稷更。新丰诚可乐，最是一杯羹。

### 题庐山龙门沟上游龙潭

碧潭吾到晚，水浅已无龙。坐想游鱼乐，空闻古寺钟。  
岸沙留虎迹，倒影映云踪。自可忘思蜀，夕阳千万峰。

### 夜雨有怀

细雨飘然至，临风向晚空。灯红明丽瓦，雷吼走云龙。  
却忆山中客，遥闻寺里钟。何当尘虑解，脱履卧泉松。

### 见邻家幼子新病有感

蒲扇小炉火，青烟旧药铛。窥壶酌深浅，就口试温凉。  
稚子娇偎颈，阿娘软语央：儿休避良药，甘苦母先尝。

### 竹枝词

荷塘十里簇清波，波上彭郎时作歌。打桨小姑采莲子，  
采莲不若窥郎多。

谁家子弟坐塘坡，关雎句句恼阿娥。莲子一颗偷掷去，笑呼女伴看呆鹅。

惊鸿一过再无波，花落花开结子多。偶见青衿扶醉过，当年心动是伊么？

### 立春

律转长河回斗柄，泥融旷野起和风。人行淡淡烟光里，春在离离草色中。且放吴江云外暖，休停桃蕾竹间红。何须浊酒伤冬景，枕畔虫声已不同。

### 题浔阳江畔所拾块石

已惯浮沉浪里风，忽来相对此宵中。恰藏楚玉三分白，犹带齐桃数点红。蜀雪日添江上水，吴潮夜打岸边空。何须言语资谈兴，自有灵犀心底通。

### 一剪梅·戏嘲人

落魄东风下白门，添了风筝，损了花痕。销魂最是近黄昏，次第街灯，烟雨归人。客里家书倍自珍，辗转叮咛，宜笑宜嗔。更无一处不温存，笺尾依稀，淡淡红唇。

### 鹧鸪天·嘲人

未必相逢尽是痴，等闲那许种相思。春风眼角从容度，夜雨生涯独力支。欢易尽，事难期。几家举案与眉齐？情缘长若一樽酒，暂遣孤清不遣饥。

## 草啸（15首）

萧美钢，1958年生，江西南昌人

### 捕蝉

一个长纱套，两三淘气童。柳梢笨知了，跌落笑声中。

### 读诗口号

笔墨生涯枉认真，风流注定赏前村。他年我若名成就，便是先贤不是人。

### 春寒

柳欲抽芽草欲青，鸡鸣正月雨风声。西山十面寒烟重，困住春光不放行。

### 过客

彼岸天桃碍眼多，生涯已惯旧风波。前头十面春埋伏，总有诗心被网罗。

### 蜗牛

背负行囊走四方，前途风雨未相忘。输他一个安身处，笑尔房奴为债忙。

### 无题

青青依旧岸，桐落柳烟开。野鹭衔归影，残晖老钓台。藉风云自度，为水月重来。不复知春意，将愁和梦裁。

### 抚河印象

故郡河滨仄，长街已崭新。灯知城态度，水聚夜精神。  
藉酒行香子，欢歌点绛唇。风流怀抱里。潦倒不相亲。

### 秋兴

沧海淹留客，徘徊楚尽头。山堆长绿障，日驾不沉舟。  
落木风先刈，腾云水自筹。料知秋底事，渔渚老沙鸥。

### 偶题

独来斜照岸，残雪冷疏林。柳线青初发，云团黑复沉。  
看春皆浅近，向泽是遥深。不觉昏黄里，有禽倏过岑。

### 岁末断想

一载殷勤与梦乡，光阴漂白旧时装。大樟看鸟闲听曲，  
冷酒催诗暖坐阳。腹里机心甘淡泊，额头老气任沧桑。年  
轮注定春伊始，风雨重来不设防。

### 除夕有寄

学海漂流儿不还，电传音讯报平安。家山寒雨鸣雷早，  
父老残年信手难。众里烟花春议论，心头饕餮独盘桓。但  
除阴晦从兹去，倒贴新桃福字宽。

### 感怀

错为浮名累此身，长宜薄酒养精神。每思晦雨闻雷鼓，  
直面孤梅立雪津。慧眼睁开山识趣，俗心放下水撩人。但

凭截取洪崖竹，吹绿烟花十二春。

### 春江印象

西江潮汛不须猜，峡雨城云次第来。雀跃岂随人淡泊，  
风流只为绿安排。扁舟渐向深撑去，乱鹭先从远散开。幸  
此平沙能极目，春心独下郁孤台。

### 寄怀

江烟不碍舸穿行，曲岸平林绿绕城。春事已从花演绎，  
东风不许梦经营。离巢旧燕应无恙，落魄红尘却有情。纵  
使飘零成劫数，何妨一笑看潮生。

### 暮春行

家山掠目满芳菲，忍向塘南别翠微。陌树泥红花湿落，  
水田烟重鹭低飞。投身歧路缘天定，从此多情怅愿违。了  
断相思来处去，轻车莫载我愁归。

## 剑川（20首）

毛静，1974年生，江西丰城人

### 咏折尺

七尺昂藏岂有私，密疏不肯略毫丝。投闲纵使难伸展，  
分寸胸中每自知。

### 咏斧头

过硬功夫耐砺磨，授人以柄又如何。一心只顾删繁简，  
任尔横生枝节多。

### 咏泥抹子

事到高难自有梯，不分黑白和稀泥。四方坎坷全遮掩，  
粉饰太平妙手施。

### 咏卷笔刀

也曾利刃腹中藏，刊木生涯未感伤。虽是铅刀聊一割，  
助人笔底出锋芒。

### 咏橡皮

虽无硬骨似金铜，满纸铅华荡涤中。消得此身憔悴尽，  
前非知改亦英雄。

### 武侯祠

丞相亦知汉祚移，中原问鼎杳难期。鞠躬尽瘁终无用，后



主长安乐不思。

### 风波亭

一桧何能害大忠，君王默契作盲聋。谁人肯颁罪己诏，  
强半奸臣以寿终。

### 开封清明上河园怀古

总是君王恃太平，潢池鼙鼓不须惊。举国皆号丹青手，  
谁写凄凉五国城。

繁华一梦忍栖迟，故国飘零雨若丝。绣闼雕栏归不得，  
龙城苦忆李师师。

舞榭歌台感慨多，英雄事业此消磨。君王意志原非战，  
空自老臣呼渡河！

一片丹心剧可伤，昭昭天日总苍黄。至今含恨观青史，  
忙煞金牌十二行。

### 记梦

独立荒原不自危，银河耿耿万星垂。时空浩渺星如粟，  
天地苍茫我是谁。落拓江湖伤水逝，悠扬烟渚看风吹。惘  
然若失今何世，一隙驹光不可追。

### 新千年杂诗

纸醉金迷事可伤，千年景象亦寻常。履新公仆谋财急，  
斗富王孙御女忙。征敛犹难供府库，揭批久已作文章。灯

红酒绿神州夜，一样悲欢共曙光。

舞榭歌台次第开，太平气象逐人来。霓虹灯漾低胸照，  
鸡尾酒翻高脚杯。万贯逍遥包二奶，一城络绎走三陪。膏  
脂已尽销金窟，颂圣耳边犹作雷。

积弊渐成名利心，漫从体制悟浮沉。家财易补人缘浅，  
贷款难填欲壑深。约法三章皆白纸，回天一剂是黄金。循  
环渐入膏盲疾，惯看高明翎度针。

偶涉雷池胆气雄，廉能操守鲜闻终。污痕已判官声假，  
海口犹夸政绩丰。熟魏生张初不似，白云苍狗总相同。权  
钱交易申难禁，夜色依然投献中。

肾虚人有壮阳酒，囊涩我藏盗版书。优孟衣冠聊复尔，  
钟馗事业竟何如。频惊赫赫神通广，怪道恢恢法网疏。嗜  
利官商深结纳，东窗事发总连茹。

会海文山多胜游，花天酒地几时休。利无巨细争伸手，  
事有繁难但缩头。在任不为身后计，居官只作眼前谋。偏  
偏升黜如萍子，实者沉沦虚者浮。

是非休辩社资姓，成败唯观黑白猫。下岗分流图一举，  
减员增效号双雕。谋生黎庶腹难果，退食公卿意自骄。国  
有资财流失尽，最高理想事犹遥。

边庭且喜息纷争，樽俎折冲劳纵横。别署新才推特首，  
海隅久欲动专征。西山寇盗犹多事，北极朝廷犹老成。毕  
竟强梁非纸虎，远谋第一是强兵。

## 剑尘（20首）

万德武，1972年生，江西丰城人

### 初冬雨夜

雨声清夜颤灯云，槛外浮嚣万绪纷。壁上龙泉心上雪，  
只将腾蹕托空文。

### 冷水浴

从来天意渺难凭，冷暖须臾任替兴。未负男儿燕赵骨，  
中宵犹可浴寒冰。

### 题玉华山官印石，石缺一角

太古遗兹石，煌煌上应天。胎成风电际，骨锻斗牛边。  
当摄苍生命，宁安草莽眠。何堪残一角，俯首独茫然。

### 访白马寨

异代风云散，江山手泽留。斜晖苔径古，深巷雨丝柔。  
清朗春三月，苍茫酒一瓿。栖栖城市客，四顾竟何投。

孔凡章师年有迎春曲遍播诗坛，余亦和焉。今斯人已  
杳，隔水逝波，无以为寄，集其句缀成长歌七章，寄慨亦  
寄萦緬之意也

改年多感向谁论，无计重霄扣帝阍。花事盛衰关雨露，  
河山恩怨困诗魂。幽怀怅惘囊锥隐，才气销磨傲骨存。快  
意只披游侠传，苍生疾苦怕知闻。

隐约鸥痕忆旧游，浮生何事事封侯。游踪纪胜思霞客，  
民隐无书愧马周。已是乾坤无净土，更堪月旦出名流。几  
回樽酒狂难抑，移向楸枰运胜筹。

冠盖长安贵博徒，闭门闲拭种花锄。钢从百炼柔无限，  
花有他生我不如。魏晋流风归册籍，信陵成事仗屠沽。名  
花独夜空山恨，来共春寒入敝庐。

无补难酬日月新，银觞醺醑遣芳辰。金人只合三缄口，  
铁像何妨百铸身。柳色又回曾忘恨，物华兴感每无因。毓  
才未必江山吝，梦见中原岳降神。

惟岳讴吟凤阁篇，江山满目太平年。东风解禁花余悸，  
皮相难窥鹤在天。万变乾坤增阅历，一身海粟任因缘。蛾  
眉脂粉英雄剑，世事思量一惘然。

玉晷珠阴付骥驰，乱愁犹畏燕莺知。真疑饮啄皆前定，  
只许衣裳半入时。并世梅兰应解意，百年烟雨独吟诗。风  
声撼醒红尘梦，天地生才未有私。

空斋今我亦专城，别有人间怅惘情。世事如棋何足问，  
邦家九鼎一身轻。更惭妄语违诗格，每戒行吟失正声。总  
是夜深犹独坐，风云楚汉忆龙争。

### 清明上河园怀古

繁华底事等浮沤，回首春风数倚楼。泥马惟资巡狩急，  
灰痕空掩落花愁。松边酒溢孤臣泪，笛里声哀万木秋。谁  
续清明千载梦，可怜宣政旧风流。

## 无题

天末云裳乱眼飘，潇湘深处忆兰桡。一川烟草青堪采，两岸螺岑黛乍描。梅寄陇头余太息，鹤归华表托迢遥。萌丝次第堤边柳，半曳风衣过小桥。

## 访少林寺

汗漫遨游春一程，中原峙岳气峥嵘。深山豹隐精魂在，古木龙蟠贝叶鸣。别有会心归我佛，终须破壁度斯氓。少林刀挟丰城剑，掷向沧溟应掣鲸。

## 秋访株山，徐孺子，王季友遗迹

龙泽波光虚帝恩，青乌老去认鸿痕。山风饱拭浮云眼，林籁微醒古玉魂。自顾鸡虫迷得失，谁堪世路正寒温。茫茫千载归蝉蜕，何处空山夜雨门。

## 乙酉新春

枝上花开又一年，隔窗坐对雨如烟。丝弦袅袅空萦耳，囊橐垂垂总压肩。枕畔堆书多暴读，筵前呼酒乞酣眠。调心每入非非界，几处鸡鸣桑树巅。

## 次韵酬力夫兄

东君芳讯任迟迟，已惯随缘过四时。万象烟尘高榻梦，百年心迹暮云诗。人间晴雨殊非问，镜里清华尚未辞。唐宋风神悬日月，相期大雅可同支。

### 乙酉上元次荆公韵

词客无端感慨同，大王终古快哉风。鳌灯摇曳沧江底，  
周律依稀窞洞中。星火艰难思毅魄，竹枝容易付盲翁。陈  
情试向东皇拜，遍洒甘霖播大公。

### 有感连战先生大陆之行(用信之师韵)

隔水相思年复年，来归好趁惠风天。从容蹈海传家训，  
急难同戈指日渊。百载浮生终是客，千秋大义敢辞先。一  
抔黄土殷勤赠，中有高曾梦未圆。

### 端午偶作

惯任衣香杂鬓香，繁灯五月味孤凉。栏杆频拍天难问，  
星汉周流夜未央。泽畔精魂结丹橘，男儿奇气剩华章。侧  
身东望风涛满，怅对千门艾剑长。

## 胖大海（8首）

彭德华，号弘云居士，1975年9月生，祖籍江西遂川，现居赣州

### 晚春叹

西霞摇帜锦，天宇幻微波。叹月随风意，怜花奈雨何。  
饮家嫌酒少，诗者盼春多。今夜春将去，点灯寻句么？

### 答谢天堂、渔歌、殊熠等兄台

词曲联姻网是媒，虔州豫府一江开。今宵邀月滕王阁，  
何日临风八镜台？击棹轻征章贡水，驱车同赏大余梅。若  
无香讯宴宾客，惟有筵中共举杯。

### 后庭花破子·题《渔火》图

溪清渔火暖，山远暮霏寒。烟霏江渚客，浮桴归去闲。  
水云滩，移舟横泊，双鸂倒影间。

### 一剪梅·中国股市踏破六千点漫兴

问利蜂拥入股楼，开市人头，闭市人头；綦绳猎猎套  
疯牛，心也悠悠，梦也悠悠；      红绿行情怎个收？涨有  
何由？跌又何由？庄家眼泪散家流，有雨绸缪，未雨绸缪。

### 临江仙·记梦

十载离情浮旧梦，醒来一片蛙鸣。月持明媚照孤灯。  
风铃敲寂夜，数字到天明。      梦里枫桥花更好。柳堤谁  
唱轻声？妆台可有旧时矜？青春难驻足，莫笑白头生。

眼儿媚·春景

惊春杜宇荡山空，声浸万花丛。团团青翠，丝丝碧绿，簇簇娇红。断肠驿路身难觉，人在画图中。远看惨淡，近看离乱，醉叹朦胧。

沁园春·返乡

春挟熏风，红杏偎墙，绿柳飞花。问吴头楚尾，鱼沉何埠？江南塞北，雁落谁家？难寄相思，难书缱绻，碌碌空赢两鬓华，妆台怨。有伊人注目，望断天涯。无言独向征车。忆山麓高歌犹梦嗟。看漫山明月，苍茫故道。卷帘疏雨，呼啸窗纱。游子离情，高堂夙愿。数尽朝阳盼夕霞。团圆夜，邀亲朋共饮，烈酒香茶。

沁园春·晨笛

一致局刊《晨笛》

四野轻笼。圭岭堆云，茅舍飞烟。看杏花村口，牧童争道；武陵溪畔，渔父惊滩。天渡归鸿，驿栖倦客。院竹萧萧梦正残。疏篱外，有吹家弄管，一曲阳关。悠悠天籁风传。唤迁客骚人莫等闲。叹激扬文字，尽歌社稷；淋漓画笔，妙绘江山。篆印拖泥，狼毫带水。步出书斋炼伟篇。晨曦下，诵辞章曲赋，意境缠绵。



## 浔阳倦客（18首）

李瑞河，1964年生，江西九江人

### 咏风筝

五色饰真颜，招摇上九天。一朝根线断，抛骨向谁边？

### 秋词

匝地西风又报秋，浮云踪迹总难留。林前认取红枫叶，可有新词在上头？

### 彭泽马当矶抗日炮台

丘壑营壕高复低，马当矶上草萋萋。当年谁弃云中守，直任东夷更向西？

### 端午绝句

山原绿逼近端阳，蒲艾临门粽叶香。乳鸭分翎初试水，新荷半卷满池塘。

### 放蜂人

南北山原处处家，屐痕一缕丈天涯。经年过眼无他物，尽是春风和百花。

### 晚春二首

几片飘零向晚春，青枝叶上尚能闻。人言二月花如锦，我觉残香更可人。

放眼春光十里堤，花开与否两星期。东君莫负殷勤意，快遣奇葩上晚枝。

### 登永修吴城镇望湖亭

聊凭亭榭豁吟眸，四面湖山一望收。千里修江归赣水，原来清浊也同流。

### 再游云居山真如禅寺遇雨

又觅残春过此门，濛濛雾雨湿凡尘。羨他座上千尊佛，总是金光万丈身。

### 惜春

李白桃红看未真，西飞东落怨风神。经行不敢摇枝动，恐惹余花散一身。

### 烟花二题

霹雳声中上九霄，飞天花瓣落如潮。金身瞬息成灰烬，万里长空归寂寥。

### 忆山村旧景

木莲垂古树，曲径石生苔。野旷萤飞火，夜阑鸟宿槐。风吹荷叶舞，露滴野花开。忆昔谁如我，徘徊晒谷台。

### 仲秋漫笔

剪树西风又纵横，层楼寥落晚空明。林鸠断续啼新雨，

黄叶缤纷落旧城。万虑都随秋色老，一身略似转篷轻。惊心最是如霜露，怔立阶前不敢行。

### 无题

百劫红尘有是非，楚王台畔竟相违。输他覆雨翻云手，掩我张风待月扉。剩有万千丝缱绻，岂无三五梦依稀。井绳幻作杯弓影，惭愧江州一布衣。

### 再叠前韵

何故今冬百感非，年来运舛事多违。心经万象成宾客，腹饱三餐老旧扉。诗笔因循新句少，言谈木讷故人稀。寒霜未至周身冷，遍检箱中百衲衣。

### 赠人

应怜沥血剖心肝，几度书函不敢看。非是无情同草木，也曾有意觅芝兰。山关阻隔君何苦，萍水相逢我大难。窗外一声行不得，屏前人已泪阑干。

### 咏象棋

拱兵架炮各从容，抢占先机不放松。扼守纵横车掉鬮，偷窥左右马玲珑。手中计是心中计，枰上风为世上风。士相斜行无体统，贪生将帅坐中宫。

### 小桥晚憩

一番秋雨洗尘埃，小立新桥望眼开。踊跃铅云遮霁月，迷离灯火暗楼台。半身飞露寒难禁，满耳吟虫意可哀。如此光风非一夜，明朝酒后又重来。

## 莱人（6首）

熊兴旺，1963年生，江西新建人

### 偕诸诗友游丰城白马寨古宅

谁宅剑城东，符卿父子同。映门池碧绿，铺路石彤红。  
巷或羊肠绕，檐无鸟翼冯。人来不知出，仿佛入迷宫。

### 怀与殊熠、水月紫清山旧游（十首选五）

#### 邀游

平生山水耽，今出复何探？车坐五零九，人邀一二三。  
逃离斑马线，往狎紫龙潭。行渐至湾里，沿途景旧谙。

#### 崖刻

诗谁洞口题，赠此一高栖。风蚀崖身剥，苔侵字迹迷。  
读之深可叹，作者渺难稽。无拍手机里，知它像素低。

#### 宴饮

盘飧罗野味，杯酒劝佳人。清炖鱼头撤，红烧麂肉陈。  
食之心不忍，嗟尔口何仁！他者若茹素，吾知为瘦身。

#### 伤麂

昔是山中主，今为席上珍。无辜遭此戮，有恨向谁申？  
别矣溪和涧，哀哉麂与麋！非关地球小，大仅够容人。

#### 惜别

有石似臀肥，看吾下翠微。来前三地约，游罢一人归。  
受制考勤卡，怕丢工作衣。手招摩的至，临去意依依。

## 殊熠在天（20首）

黄金平，1972年生，江西南昌人

### 别歌

人本似参商，谁能不离别？酒中情未胜，歌里愁难绝。  
且把两枚心，融为一片月。关山隔纵遥，此意同高洁。

### 古诗

苍苍白云野，黄鹄去不回。冈上谁采萧？日夕动怆怀。  
思君岂得见，千里皆昏霾。寂寞愈自苦，一日不能捱。及  
今三秋矣，枯叶飞阶苔。黄花殊未凋，含馨俟远来。

### 城市印象

城如大野之弃骸，无数车虫爬不已。废气一腾日窒息，  
乃向沧溟坠脱轨。繁灯细照流动人，褴褛光鲜各莫比。楼  
宇纵浮云海出，犹在红尘荣辱里。航机起处慎飞翔，银翼  
凌划月有伤。

### 游梅岭景区之长春湖

峰顶谁相招？遥为挥云帕。尘陌倦奔波，乃此息车驾。  
盘磴似老奴，惯引来访者。林木秀且繁，何妨翳视野。时  
现花陪侍，忽到龙喷泻。喷出满壑雨，浑未觉炎夏。高山  
围抱处，湖自示悠暇。竹排滑如鱼，翕忽斜阳下。胸各有  
城府，事俱泯真假。盈盈水何深？中不藏虞诈。趁风掷素  
衫，一鹤或能化。

\*山上湖畔有许逊镇蛟石雕，龙喷日夜。

### 题依依紫竹院组照之松鼠小照

看照遥如游一回，机心片刻倘无猜。共谁邀饮凉阴下？  
松鼠来窥石上杯。

### 咏蹄

深浅何堪顾印痕，其谁袜屐不沾尘？直须夷险经行遍，  
都是人间负軛身。

### 陪莫名、停云深夜游象湖

#### （莫名）

隔洋飘到夜微霾，惘眼湖灯睁不开。犹有垂杨扫深径，  
殷勤只为客人来。

#### （停云）

水声摇漾略如言：“未必江南胜此间。君看象湖深静  
处，有云缱绻拥波眠。”

\*1 莫名来从美国；停云次日欲之杭州。2 是夜湖灯俱灭。

### 题秋灵新居片片有赠

一幅开冬晚，寻伊欲拄筇。冰溪荒野外，雪墅密林中。  
才自能吟絮，身谁不是蓬？漫云重海隔，人只隔帘栊。

\*秋灵台湾人，旅居美国。

### 紫龙潭

佳人濯纤足，潭色一何纯。不觉林高处，相窥有白云。  
颇有清奇石，真如幽隐客。深宵各不归，坐卧寒潭侧。

### 梵钟

梵钟敲自若，松石竟谁听？潭小能容瀑，山高不碍鹰。  
风吹群壑动，身似一帆轻。彼岸何由达？苍茫云海生。

### 望月（二）

最是玲珑好，隔江烟景殊。梅应知雅意，野不舍寒庐。  
嘉客惭空座，清光幸满壶。何当济沧海，随我一帆孤？

### 咏杜鹃花

原为地中火，蕴怒不堪埋。朵朵忽如迸，山山相唤开。  
云浓枉飞雨，林茂更添柴。犹恐万方黑，红燃上峭崖。

### 送人赴杭打工

等闲聚散莫依依，分手还同握手时。九地正宜骐骥骋，  
一年最好蝶莺飞。要知事总由人做，任是箫因乞食吹。西  
子容光今昔在，未妨莞尔去如归。

### 和野人兄

作个野人吾亦羨，余生赢得是消磨。溪中藏住斜阳好，  
衣上飘沾乱絮多。峰势初如争鹜烈，笛声一拂转温和。霭  
深未肯轻归去，笑拍诗囊饱了么？

### 醉落魄

遥山未改，夕阳来补墙头坏。嚶吟翠羽飞苍霭，丝柳  
垂垂，池畔如相待。碧荷冉冉皆擎盖，故园记得儿时  
采。二三童孳今安在？独上高亭，只觉南风快。

### 好事近

辜负几芳春，只为当初情错。弯月关山吹起，似城头孤角。思量第一断人肠，偏又思量着。樽酒谁能今夕，忘红尘哀乐。

### 醉花阴·赠月怀玉

梅屋应如雕栝状，蕴玉谁能赏？几上一琴横，怕拂朱弦，山水同凄怆\*。梦魂昨夜曾孤往，寻到深深巷。欲叩复逡巡，只向阶前，偶触花铃响。

\*怀玉擅古琴。

### 城头月·夜归

相逢谁与论襟抱？酒肆休嫌小。进处轩昂，出时踉跄，树影孤蟾皎。街灯恭谨留条道，让过归人好。要信微醺，颇添猛气，能骂群楼倒。

### 蝶恋花

原是春晖无厚薄，照净彤云，双燕轻飞掠。争上枝头红踊跃，晴川烟润山非昨。心素渐随溪水活，树下相依，朵朵妍如诺。纵使暮春花不落，欢情容易成萧索。

\*张炎《水龙吟·白莲》：隔浦相逢，偶然倾盖，暗传心素。



## 虔青草（12首）

刘荣青，1948年生，江西赣州人

### 读鱼乐《生查子》有感

春光无限好，何必自烦恼？天命有常规，欢心才不老。

### 词牌拾趣

《瑞云浓慢》《倦寻芳》，《索酒胡州》《昼锦堂》。  
《玉树后庭花》《酹月》，《红情绿意》《惜春郎》。

### 贺世界客属恳亲会在赣州召开

天高云淡又金秋，盛会虔城乐悠悠。游子此番寻祖籍，  
客家即日拜宗楼。飘零半世思多苦，欢庆一时意怎休？安  
得乡音常奏起，莺声雁语壮江流。

### 次韵和落草堂主《无题》

胸中郁闷莫虚空，诗酒撩人唱大风。兴趣繁多争寂寞，  
友情深厚坦离匆。菊耽秋意花黄艳，枫借骄阳叶紫红。若  
得知音虽一二，天南地北亦心同。

### 浪淘沙·题梅艳图

冬去却尤寒，大雪迷天。迎风傲立腊梅鲜。昂首挺胸  
观世界，春满人间。绿叶更娇妍，情意缠绵。此时花  
胜昔时嫣。待到百花齐吐艳，爱在心田。

采桑子·赠黑河网盟论坛诸友

别离屈指才盈月。醒也相思，梦也相思，秒秒分分无尽时。情牵网络深迷恋。白日论坛，夜晚论坛，一片痴心寓键盘。

浣溪沙·次韵月怀玉《浣溪沙·答友赠诗》感怀

世事由来本易奢，时光稍纵误春华。岂能浑噩度生涯？花蕊蜜蜂来往雁，墙根蚂蚁扑腾蛙。欢情总在累中赊。

卜算子·母亲节感赋

佳节倍思亲，心绪添凄苦。已是阴阳两界人，何处重相顾？世事尽蹉跎，性直人多妒。幸得高堂沥血滋，未把青春误。

戚氏·秋暮感怀次韵横笛姑娘

碧云天，十里江岸锁寒烟。冷月清幽，大河奔流，若翩跹。虽寒，倚栏杆。风声渐紧绕身边。秋来草木衰落，翠隐红匿景萧然。早惯冬近，偏愁春远，竟生多少缠绵。向苍穹有问，何故如此，冷暖循环？闲转，尽享当前。筋骨硬健，好度影珊珊。无奢望，只求消遣，怎计绸衫？已经年。坎坷往事，催人奋进，建设家园。老天有眼，不负辛勤，满载青果荣还。转瞬多华发，惊青少逝，入甲花斑。壮志心头未老，又岂能酗酒醉狂欢？罄余力再扬威，愿拼一博，终教边陲变。纵瘦身憔悴毫无怨。才慰我，潇洒人间。兴致时，热泪长潜。沥心血耿耿此情宣。况豪强绊，红樱在手，利箭张弦。

齐天乐·读辛词感怀步白石韵

向来迷恋辛词赋，铿锵抑扬铮语。激烈情怀，幽思故国，均乃撩人心处。沧桑抨诉，似钟磬敲鸣，巧施袖杼。耿耿胸怀，任谁不为动心绪？深秋少来细雨，净风和日丽，清气无杵。网络传诗，荧屏弄句，得遇知音堪数。机缘怎与？愿同好男儿，至情痴女，携手词缘，享耕耘乐苦。

八声甘州·读柳永《八声甘州》，反其意而用之

对飘飘瑞雪落群山，北国好风光。赞物华似锦，松青挺劲，梅艳清香。羞得红藏翠隐，点点尽银霜。更令龙江水，顿失奔忙。竟欲登高临远，望故乡新貌，激荡心房。忆蹉跎岁月，北斗引征航。愿椰林雪山巡遍，洒青春热血沃边疆。倾情唱，帜红灯灿，任重途长。

[中吕]山坡羊·随感

半生匆过，花开花落，是非曲直由人唾。纵蹉跎，欲如何，诗词曲赋寻常作。深意薄情休上火。忧，也是歌；欢，也是歌。

## 剧饮千杯（20首）

萧剑勇，1972年生，江西泰和人

### 早发兴国至梅陂有作并呈肖君龙闽

连江浮腥滓，木末荐秋霖。长条集深涧，薄雾掩危城。  
霜重寒愈迫，四野寂无声。摇兀车厢里，屈指计行程。道  
傍多苦李，梦余失故山。淹忽成逆旅，前路实可瞻。梅陂  
适濯足，脱袜若狂狷。迹来萌故态，挺崛最少年。

### 忆昔应甫堂老邀海宁观潮有作

奇景似待邀客急。绝足东南来此邑。霹雳天风吹海立。  
振衣未解中肠湿。君年半百我三十。津梁欲济无舟楫。须  
臾孤光收海泣。如潮不断百忧集。

### 归乡四章

湖头信是故山居，云瘴烟溪隔旧庐。乡老连声呼过酒，  
醉中尚觉姓名疏。

注：余年少负笈在外，二十年来始还乡，村中耆老多不识也。

重门掩映碧藓围，古树婆娑晓露稀。垂老十年春未透，  
只将棉衲换缁衣。

注：过湖尾庵堂，中有一老尼答礼甚殷，眉目间尚见旧时风韵。

残瓦青幽屋角斜，深宵苦雨蔽窗纱。败垣无碍东风路，  
颓树西园尚着花。

注：老屋，余出生地，今破败不堪，东风自舞也。

鄮侯事业夸江左，帝子文章继六朝。不作建安风骨论，

陈堂钟鼓久萧萧。

注：遵族老嘱，为余萧氏宗祠撰一榜联，堂名“作述”，聊以“相联八叶，文选六朝”八字塞责也。

### 南门外送友

春水绕长堤，远山排闼齐。情归南浦外，风送碧云西。  
扰梦蛙声噪，伤时燕语低。依依杨柳径，芳草复萋萋。

### 友人麓湖招饮

湖上饮新晴，波澄草暗生。霞光侵远树，岚气乱飞莺。  
物外声多迥，风来骨欲轻。倚栏人醉后，茶好倩谁烹？

### 晨起登东门台

登高何所适？渐觉夜来非。曙色红千树，畦香绿一围。  
台荒人迹少，心静好音稀。独坐知云上，轻风乱我衣。

### 应友人约，夜航溯赣江而上，暮发而朝至，感而作

影逐江声远，秋潮夜有痕。叩舷兼百味，流火乱千村。  
玉笛残吹梦，佳人静倚门。披衣起寒肃，遥看数星存。

### 次工部韵秋兴八首

断云失路渡青林，乱影寒鸦暮气森。残照风烟犹带色，  
壮观天地欲翻阴。清芬俱下麒麟趾，玉盞重来琥珀心。落  
笔无凭皆变化，蓬门千古想秋砧。

尽日无欢欹枕斜，闲居僻地老年华。依违北国王孙草，  
稳泛中流帝子槎。三载楼头虚夜月，几番心底迭清笳。长

藤石凳生凉意，随数阶前未谢花。

晦明变化看斜晖，彩笔文心渐式微。估客衡名听玉坠，华章趁价待时飞。试声雏凤丹墀起，倦首雕龙白发违。毁誉寻常思结网，临渊每欲羡鱼肥。

翻覆尘泥国手棋，腥风浩劫有余悲。秋山寂寂经霜后，寒籁泠泠过耳时。龙鹤簪纓多辟易，虫沙间道倍驱驰。冻云已合天涯路，无复阴氛净尽思。

少年曾惜此名山，消息空传道路间。百越雪涛惊锁钥，三秦烟树下偏关。敲残宿海昆山玉，舞破幽妆粉砌颜。十载拿云心尽洗，行藏愧对圣贤班。

朝来爽气水西头，澹荡无涯郁郁秋。挂席霜风初解意，浣衣少女不知愁。千寻雪浪侵孤屿，万里江烟渡一鸥。濯足前滩旧游客，伤心直下古虔州。

袞袞争传汉将功，九原底定一望中。兔葵燕麦垂虚鼎，石碣残碑唱大风。蕉鹿初肥双苑紫，旌旗欲压十年红。盐梅绍圣遗新策，樗枘余生愧老翁。

重峦峻阁自逶迤，缓急清流入暗陂。此日客城逢旧雨，来春别浦送新枝。疏疏灯火楼台黯，隐隐歌声斗柄移。一夜西风花尽谢，明朝起见乱云垂。

## 左岸

左岸文章天下胆，清寒未解桂华痴。乱云迟日成泾渭，唳雁长空付管吹。绝似风来双展翼，偶无人处一扬眉。会

心不寄青词意，乐圣停杯写楚辞。

### 步山谷韵重登快阁

重来携酒春将暮，人去阁荒鸟弄晴。古径微苔心向晚，  
榴花一树眼空明。庙堂已隔天南北，笙笛难平意纵横。却  
喜澄江千载月，清辉犹记旧时盟。

## 梅云（18首）

熊盛元，号晦窗主人，1949年生，江西南昌人

### 二00五年元旦后一日雪晴与当年下放知青重访故地恒湖东江一大队

我来鄱湖滨，沧波何浩渺。鬓随草同衰，梦与鸥俱杳。雪底葬青春，几人曾知晓？弹指三十年，树已插云表。苍天果有情，缘何不速老？屋破仍如昔，衡门枯藤绕。当时同窗友，而今成翁媪。儿孙虽满堂，容颜尽枯槁。不忧上学难，只求能温饱。标语书墙头：三农政策好。同行皆叹惋，我亦心如捣。怆然望田间，残雪犹皎皎。

### 丁亥孟春与江右诗社诸君游蒋巷

城居春踪杳，郊游旷怀深。柔荑连天际，懒云落湖心。一啸群鹭起，排云破层阴。骚客伫风露，振衣共长吟。徘徊天桃下，幽梦驰邓林。妙质一时得，绿蚁还自斟。座中有三美，醺然堕珠簪。瑶台即在迳，何劳远相寻？骊歌莫轻唱，无奈日渐沉。驱车临歧路，小别成古今！

### 游翠岩禅寺，雨霁月出

紫薇雨中香，绿烟襟间冷。闲坐觅我心，但见花弄影。月坠太古波，云生妙高岭。磬声何泠然，夜阑孤星耿。

### 星子天沐温泉口占次朱晦庵韵

九幽凿温泉，一池轻烟起。曲中曳霓裳，无复歌下里。骊山太真愁，未睹秀峰美。胡儿垢尘多，莫炫躯干伟。气豪与情柔，尽消神奇水。贪嗔与痴慢，到此应全洗。转思



穷乡间，寸心如焚矣。披襟自徘徊，泪滴香雾里。

丁亥端阳前三日夜宿丰城玉华山极顶紫云洞天宫分韵得“有”字

洞天石扉开，仙风拂尘垢。袖底生云烟，胸中罗星斗。同济意飞扬，洒然狂呼酒。欲邀浮丘公，空空证妙有。相视同一笑，会心聊缄口。天外翼轸沉，匣底虬龙走。席地且醉眠，鼾声若雷吼。

### 访梅岭野人山房

营此方寸地，胜彼神仙窟。卷帘翠云流，对酒清兴发。朗吟遣孤愤，轩举如健鶻。朋侪时时来，放浪情郁勃。他日愿卜邻，相期砺松骨。

### 诸暨五泄歌

未见飞瀑影，先闻殷雷声。百虑一时尽，五内俱澄清。漫穿幽深谷，来寻虬龙骨。怪石多峻嶒，精魂何郁勃。万古积怨潭底沉，泪泉汨汨流不竭。一泄层崖巅，迷蒙起岚烟。千匹轻纱笼晓梦，茶靡花雨飘满天。二泄峭壁下，云阵驰素马。吴越交锋金鼓鸣，败甲残盔弃荒野。三泄风卷钱塘潮，箭矢攒集海山摇。鼉怒蛟泣人颤栗，冥冥毅魄谁可招？亭畔葛听生绡裂，抬眼惊看第四泄。跳珠乱溅凉侵肌，三春何来霏霏雪？乘兴更向五泄游，银河倒挂白玉楼。龙女扬袂翩然舞，山鬼应节试珠喉。我携烟霞客，远追巢由迹。抖落襟上尘，暂与俗世隔。何当结庐傍松林，醉里高眠醒弹琴。尽泄胸中不平气，长伴空潭五龙吟！

### 中元节感赋

幡影幢幢鬼面燃，三牲祭向净坛前。不知尘海茫茫劫，  
谁为苍生解倒悬？

丁亥中秋前一日，漫步青山湖畔，时正挖湖底隧道，  
水全抽干，怅然赋此

碧宇螿蟾老，沧波一夜枯。吞声蓄残泪，心底欲成湖。

### 漠漠

漠漠云天一雁来，越凫楚乙漫相猜。秋江已涸蒹葭老，  
黯淡星沉旷古哀。

注：梵语孟兰，华言倒悬。

### 向晚

向晚无一事，支颐闲看云。高斋梦清寂，远岫气氤氲。  
铿尔瑟声响，恍如仙界闻。红尘何所恋，鸟兽与同群。

### 夜坐佑民寺偶得

梵天花簌簌，香定自斋心。一树风初起，四厢秋已深。  
残钟敲梦断，旧我伴谁寻。欲共霜娥语，娟娟月影沉。

### 此心

此心无所住，浩渺没虚空。不辨形耶影，长教异等同。  
萤光飘夜黑，铅泪渍霜红。坐看云飞起，还沉碧涧中。

### 次韵和颖庐

迷茫海月幻高台，万顷琼田一镜开。素袂风生空怅望，清涟雪涌莫惊猜。掬来如意瓶中水，拭尽弥天劫后灰。底事菱歌声渐歇，沉沉梦断釜鸣雷。

### 无题

雨洗瑶阶血褪红，剑光仍绕紫垣宫。三千劫尽天难老，十八年来梦渐空。隔世人惊柯烂后，返生香黯月明中。山阳笛起梅花落，酹酒招魂处处同。

### 与江右诸子游梅岭铜源峡

竹海苍茫翠扫空，寻幽路仄兴无穷。仙缘暂缔烟萝里，尘梦都消水碓中。石蕴千年蔼然气，襟披一峡快哉风。当流未许心源涸，掷笔霜天幻彩虹。

### 如梦令·与江右诸子夜宿玉华山分韵得“有”字

倚石论空谈有，剑气夜横牛斗。山鬼影迷离，正是平明时候。倏傴，倏傴，人与修篁同瘦。

### 鹊踏枝·丁亥端阳步冯正中“谁道闲情抛掷久”韵

应念骚人沉恨久。泽畔幽兰，岁岁香如旧。莫向江潭空酹酒，鱼龙惨淡吟魂瘦。    飘尽鬓华枯尽柳。片霎春韶，镜里何曾有？乍见湘灵舒羽袖，黛螺青到遥峰后。

## 皎月（20首）

伊姝桦（女），1972年生，湖北蕲春人

## 西域悲歌

少卿元自生虎门，赫赫家声振邦邻。缘善骑射拜都尉，人识岂因飞将军。天下横行男儿色，驰骋何不建功勋？尝思封侯酬先祖，欲经沙场叱风云。昔闻飞将草木惊，今日后裔思北征，少研兵法每叹息，壮年报国自请缨：北域裨闳突异军，愿为起兵扫胡尘。屯边勇士力扼虎，定不辱命作汉臣。重振天罡待何时，玄武门前愿誓师。闻罢陈情天子悦，诏许兰干逐蛮夷。可怜报国心犹切，孰料艰虞天恩薄。御批区区五千人，丈夫怎改千金诺。旬月率士击北戎，云中旌旗猎长风。自古英雄轻生死，纵死沙场亦从容。浚稽山上烽火燃，多年夙愿长铗弹。勇决不教匈奴犯，一豁妖氛平边关。汉军奋勇尤忠烈，千弩发敌倒应弦。山谷腾腾尽杀气，虏军三万视等闲。单于复呼兵八万，可叹汉军无救援。射矢皆尽绝道逢，贰师未肯沙场现。短兵相接血纷纷，沙场忍见日月昏。岂是单于能伏虎，天困英雄获生擒。羽箭雕弓曾抖擞，挥师誓取单于首。豪言今换涕泪流，仰天一问谁之咎。单于收为麾下侯，汉服褪去着狐裘。非是丈夫无死节，留取此身待后谋。从此天涯翼难张，独对胡天心欲狂。汉云万里鸿不到，怎知囚客愁满肠。雪压青毡衿裘冷，忆里家亲何曾忘？入梦夜夜皆汉阙，触目处处尽蛮荒。由来天意高难测，圣心转被青蝇惑。前度嘉许翻作疑，苟活思反岂功德？欲报家国完名节，时不我与空悲切。可笑帝阙寡天恩，英雄徒遭满门灭。莫道男儿铁骨铮，闻此惨祸几喋血。肝胆如旧谁与论，血泪兼吞不可说。仿佛大梦今初醒，拔剑欲将天割裂。朔风塞外正悲回，哭向

泉台道应绝。可怜英雄多末路，兵败国弃已无家。从此与汉无瓜葛，只身飘零困天涯。万里关塞正茫茫，北风起兮边声亢。空抚金戈与铁马，未惯臃肉与酪浆。南望故国频回首，人间何处不沧桑？闻道苏子囚胡地，北海玄冰正牧羊。不辞迢递远相访，故人相见泪成行。把臂唯觉肝肠裂，悲声凝咽久低昂。眼前苏子霜满头，旄节在握见应羞。绝处相逢多感慨，清樽一酌为君酬。年复年兮长郁郁，与子犹是同根树。今交莫逆叹已迟，万言不绝长相诉。相诉胡汉怨未平，蹉跎岁月尽峥嵘。但见颜状镜中老，争知宝剑匣中鸣。心中块垒凭君吐，身后浮名由人误。生不足惜死卧窟，不劳儿孙收骏骨。万般愁恨到华巅，功名已溃遍拍栏。不见胡汉刀兵歇，但见汉月几回圆。辗转始元信史来，天子传诏苏子回。持节长望十九载，白头归境感复哀。执手相送泪如倾，车辙踟躇未同行。此身老尽极边土，难赎罪业负汉名。浮云一去难相见，樽酒聊慰故人情。寒袖挥时心戚戚，春风吹处草青青。风烟尽处云天渺，谁见山河曾改颜。塞上犹闻胡笳怨，长使英雄泪泫然。

## 春二首

野水孤山鹤可驯，梅花绕舍自成春。风烟此际无须买，闲却苔钱百万缗。

一番新雨绿菖蒲，水似春醪可奉觚。舟畔青山今独醉，凭风俯仰待人扶。

## 枫桥

千年寂寞姑苏月，犹照繁华上越台。渔火已随张继去，枫桥谁正泊船来。

### 寄病中故人

序：河南同窗于数年来访，曾移吾家幼梅一株带回培植，过二年乃相告：梅发新枝，汝何时来也？今闻豫另一故友身患重病，心甚悲之，乃寄。

茫茫洛水隔重烟，我负梅花又一年。遥问历经霜雪后，春风可到故人边？

### 贺风儿生辰

鸿书渐向山阴去，明月犹从云隙来。陌上清风无俗事，如今只遣百花开。

### 宿莲花古寺

潭水映天容，薄烟侵碧峰。林疏风澹澹，云瘦月溶溶。桂叶清秋露，芸窗晚课钟。门前无雁过，问道有青松。

### 登高

秋山未改容，断壁接天风。雁荡孤单字，云摩第一峰。红尘奔眼底，大道问谁宗？远寺钟声响，依稀传数重。

### 思念

空庭月色闲，冬至又穷年。无雪梅花瘦，深窗鬓影寒。情于何处醒，愁并一灯燃。雁字君边去，孤怀岂可传？

### 谒中山陵（二首）

赤手摩霄运大悲，山河忍顾泪长垂。欲教完壁归民主，岂计飘蓬挽国危。波浪滔天多板荡，风云匝地久驱驰。丹心改写家天下，身后名交无字碑。

当年巨手扫苍冥，倚剑屠龙自请缨。风雨两肩承大义，江山一壁向新晴。衣冠伏处云空断，白鹤来时月正明。功德何须铭鼎立，唯将千古让先生。

### 岁末于武汉探母

楼高岂绝故园心，共我窗边望远岑。孤月不知人久病，无情还照夜深沉。每从雪鬓怜迟暮，只向萱堂报好音。最怕别离相送处，西风拂面泪沾襟。

### 岁末感怀

古城风雨误归期，非是烟津多阻离。倾盖始于春去后，怀君直到雁来时。鄂东今岁犹无雪，江左梅花可满枝？此夜焦弦堪捍拨，曲中必定说相思。

### 生日感怀

年年今日等闲至，又见梅花为我开。三两故人分薄醉，百千往事掷轻埃。纵吟白雪篇无数，可抵青蚨子几枚？但得浮生真趣在，相倾不必说长才。

### 吟春兼寄燕子

静夜楼头闲倚栏，独同明月忆江南。春回乔木空生霭，天入吴波宜泛船。应料东风回槛外，渐吹心事到吟边。我今无语频相问，千里知君续草玄。

### 秋夜感怀

桂子枝头香减无，秋风卷处叶萧疏。招来似水窗前月，

同读如山案上书。灯影两肩春鬓老，生涯一段海云孤。此心犹共沧浪远，何日归田建我庐。

### 无题

经年寥落闲庭院，瘦竹自撑天一片。月与孤楼初并齐，愁同丛菊犹开遍。寒灯合是照生涯，好梦何曾羁枕畔。寂坐无言夜未央，唯听窗外秋风唤。

### 深宵感怀

欲呼明月隔云层，独步深寒转玉绳。我道春风无处识，谁怜萱草有珠凝。一川烟水愁如是，十载风尘语不能。从此抚膺余浩叹，已输胆气拭峰棱。

### 次韵武陵人答陈十二君问官家洗牌事

未歇狂心已着魔，诸般色相演娑婆。真名举子从容少，盗世书生买笑多。珠履三千连绶带，金钗十二抱庭柯。尊罍开宴华堂上，记得穷膏百姓么？

### 水龙吟·悲李陵步稼轩韵

冻云欲结胡天，征鸿渺渺浮天际。轮台驿路，平沙莽莽，远山如髻。北望长安，陷愁西域，耻为臣子。骂狐裘已着，英雄落魄，何人解，其中意？漫道西风佐脍，问斜阳，汉云来未？饮冰吞炭，等闲辜负，平生剑气。暗忆泉台，满门忠烈，恨应如此。告儿孙后辈：他年吊我，不须倾泪。



## 紫藤（15首）

冷迎春（女），60年代生，江西修水人，现居九江

### 米兰

繁星缀梦忆清佳，霜雪凌风瘦影斜。润雨枯枝重绽绿，  
分明满树着心花。

### 菊

金篦梳云带露开，东篱雅韵上高台。寒塘香冷凭栏处，  
疑是春风送客来。

### 重阳念父母双亲

水榭重阳怜柳荫，西风漠漠叶飘零。清园一别家山杳，  
片片乡愁不着云。

### 早春柳韵

一夜春风次第开，袅娜又上望乡台。清波摇影心湖动，  
红日萦纱紫气来。放眼何须千里目，通灵但取几丝苔。林  
梢脆语频相慰，如梦依依总寄怀。

### 挚友久别短聚

一弯秀水隐层林，紫院莺声雾里寻。鹤影飘来疑月至，  
花魂散去盼春临。人前默读星眸语，亭内清聆玉涧音。不  
尽江流浮柳絮，离愁万点作心箴。

### 岁末感怀

殷殷侍水理昀轩，捡点诗囊又一年。听雨迎春芳草地，  
慕风扬柳碧云天。镜湖灯影玄幽境，青梦忧思绕玉泉。遥  
忆兰馨何日促，心香一缕入螺烟。

### 冬日

任是平湖也动容，荻风寂寂入寒冬。江流古韵诗情淡，  
梅驻芳心画意浓。更喜九天飘瑞雪，犹怜万里隐春踪。冰  
消润得山河绿，秀木葱葱起卧龙。

### 痛夫君病

风袭高梧骤雨添，愁肠揉损水晶帘。才亏八斗谁堪惜，  
貌逊三郎我却怜。一片苦心煎作药，两行清泪洒成盐。如  
今不慕扬州事，唯愿春明凤侣旋。

### 有谢文兴夫妇赠茶

新芽碧叶劳相赠，春意徐徐四季鲜。紫器添香温似玉，  
青山有韵水为弦。壶中真味楼中品，峰外太虚镜外悬。汲  
得明泉存慧蕴，天清一洗羽如仙。

### 看楼市

不辨长街名与号，楼盘初入两相邀。书生怜己为寒士，  
商户逢人认富豪。水木清华添画境，仙山琼阁看新潮。秋  
风且喜能兴雨，润得层林节节高。

### 逛书城

一进书城意自清，浮尘不染此间坪。农医各业行行列，庄老诸家部部呈。图展西中天地大，节陈春夏物华明。稚童随父欢声起，恍是当年傍母行。

### 昀轩书韵

依山傍水正朝阳，方室几间作课堂。侍水相夫清院至，培桃育李杏坛忙。来宾过客恭身会，浪蝶狂蜂拂手扬。恩爱无猜尘不染，有心父德业中藏。

### 忆秦娥·父母仙逝十八周年

哀念霜如雪，清寒卷雨珠帘叠。珠帘叠，丝丝愁接，雁翎何歇？紫花墩上梧桐叶，柳烟古道行尘绝。行尘绝，空檐点滴，浸淫心阙。

### 浣溪沙·七夕与夫

紫艳含情绕小楼。罗衣曲径沐新秋。天街鹊语正清悠。脉脉星眸柔似水，纤纤素手握还羞。此时心境好长留。

### 鹧鸪天

年少朦胧情已钟。心之一曲醉颜红。紫花羞映庭前月，修竹清吟袖底风。时过隙，节还逢。年年七夕与君同。心香如烛长相照，鹊语轻轻送院中。

## 楚成（16首）

涂运桥，1972年生，祖籍江西临川，现居武汉

### 正月二十日夜与同事聚饮于老房子大酒店席上赋

云涌风生日月浮，呼朋买酒上高楼。开怀豪饮胸襟阔，  
拍案狂歌岂复愁？

### 楚城感怀

暮色苍茫下楚城，解舟何处问前程？一杯浊酒青山外，  
听取江南风雨声。

### 东莞与北社诸君雅聚有感

引项高歌处，南城与莞城。雄关龙虎踞，要塞角弓鸣。  
一夕金樽饮，无边暖意生。凌云挥健笔，吐纳九州声。

### 登华山有感

名山邀我往，西岳最多情。风暖松涛紧，日斜云海倾。  
峰从绝壁转，人傍险崖行。回首来时路，心闲万事轻。

### 东湖采莲

蜻蜓叶上栖，点水舞腰低。双桨波心里，扁舟落日西。  
采莲风细细，折柳草萋萋。笑入荷花去，归来却路迷。

### 咏棉花

莫作寻常花木观，生生世世抱成团。群芳争入时人眼，

唯独此君驱岁寒。

### 东湖春日晚景

古道长亭野草花，磨山深处隐寒鸦。笑看宝塔斜阳影，  
闲品东湖绿羽茶。十里柳堤铺锦绣，数行白鹭过农家。画  
船侧耳听潮起，欲觅笛声月已斜。

### 东湖咏怀

千古江山费剪裁，登楼极目楚天开。东湖帆影磨山外，  
古刹钟声汉水来。草木萧萧空故垒，秋风瑟瑟寄余怀。劝  
君莫叹知音少，盛世中华赖俊才。

### 东湖杂感

潋滟东湖水一方，长天楼外碧荷香。渔舟唱晚风飘絮，  
竹海听涛月隐霜。楼影千重潮涨落，鸟声百啭意飞扬。楚  
天台上开怀抱，笑拥河山傲帝王。

### 西江月

踏遍江城山水，少年旧梦难除。而今十载影犹孤，立  
尽斜阳无语。最爱雁桥残月，兴来疾走狂涂。书成醉  
墨晚风疏，相对东湖白鹭。

### 蝶恋花·咏梅

最是严冬飘瑞雪。一夜寒风，直欲催花裂。飞上眉梢  
犹皎洁，何须惜取明朝别？此花尽染诗人血。傲雪精  
神，引得千秋折。纵使才高词亦拙，也难绘出风中烈！

临江仙·夜巡有感

风雨如磐何所惧？戎衣立尽余寒。英雄埋骨有青山，  
荣名身外事，心系万民间。醉里豪言君莫笑，前途道  
道重关。战歌声里月初残，壮怀时刻在，夜夜国门边。

浪淘沙·保钓勇士登上钓鱼岛有感

沧海暗云封，一棹孤篷，钓鱼岛上又春风。不见国人  
多少恨，老了渔翁。莫笑志如虹，虽未从戎，丹心保  
钓九州红。七子乘风登岛上，真个英雄！

贺新郎·东湖感怀

湖畔春来早，柳依依、微沾晨露，欲寻人杳。妩媚千  
娇知何处，不忍重看小照。忆往昔、相思难表。蝴蝶双双  
花间舞，剩孤舟、空泊湖心岛。风逐浪，水云绕。东  
湖旧事随风了。莫彷徨、青春岁月，为情牵扰。百舸争流  
齐待发，别恨离愁尽扫。纵只影、长歌当啸。天使但藏心  
底好，望楚城，高谱阳关调。挥手去，向天笑。

水龙吟·谒武昌蛇山脚下汉王陈友谅之墓

算来堪数英雄，荒阶野径谁凭吊？巍巍宝塔，滔滔汉  
水，空余夕照。墓草萧萧，孤鸿声里，烟消音渺。将萋蒿  
折断，碑文轻触，因何故，无人扫。遥想沔阳年少，  
立西风，仰天长啸。渔家小子，强权何惧？胸怀远抱。逐  
鹿金陵，鄱阳一战，剑沉湖淖。叹儒生谬论，古今历史，  
以兴亡较。

## 颖庐（12首）

段晓华（女），1954年生，江西萍乡人，现居南昌

### 漾陂行

巨浸浮山莽古来，依旧空翠拔不开。雨霁冲泥原无路，曲桥入岛生锈苔。唯见土塑状寝陋，好奇兄弟杜陵叟。夜吟或有山魈听，高案蛛丝罗俎豆。终南雪巅倒影皤，欲斫鲸鬣斧无柯。盱衡落日极渺小，扶摇云絮血色多。嗟予千里之外大江西，亦有古村号漾陂。人物依稀认隆准，老辈犹着客家衣。自云兵燹涸天水，连屋深围万山里。侧身北望泣家园，纵有彩鹞飞不起。书生意气偏好古，炎天更邀冯夷舞。岂持钓竿测海深，叫关百二莫之顾。君不见，瀕洞凉波啮石根，灿灿开煞几丛萱。游屐一去又阒寂，画本留与野风翻。

注：吾江右吉安青原山麓漾陂古村，亦为旅游热门之地。赵宋南渡初年，有长安梁氏带领族中子孙，迁徙此地建村。

### 古意

九天饯春宴，琼浆泻奇瑰。接来云心雨，酿作梦边梅。欲寄道路远，流水莫相摧。应知酷寒后，花光最难回。

### 温泉

也作倾城浴，只无烽火台。人声兼百沸，若个濯纓来？

### 露坐玉华山顶

直可扞星粒，恍听仙鼓挝。蓬蓬生两翼，渺渺失孤槎。老萝牵石龕，细烛坠烟花。和衣飞露下，良久默南华。

### 岁暮简晦窗

高卧知君阖两扉，满城雾压一灯微。翻残古叶听湖响，立遍空林待鸟归。昆岳攀飞天欲缺，蒹葭洄溯意多违。梦中记得来时路，冉冉红云湿素衣。

### 偶触

偶触西风指下弦，蜉游惊看海成田。漫言涩曲难为续，环诉幽心绝可怜。险梦入秋疑有路，柔痕似水忽无边。六朝人去知音渺，弹破沉沉南浦烟。

### 除夕小雨守岁二首

万簇烟花和雨飘，霓天歌窟醉今宵。不知寒薄衣当减，翻觉肠枯酒易浇。灯共轻帷移幻影，诗磨慧剑割愁潮。西楼守得逃空意，自把心香宛转烧。

照眼烟花向雨开，划如奔电落金罍。扪心勃郁呼将出，得句遭回矜未裁。帘底不时收笑语，陌头何处卖痴呆？春盘办了支颐坐，销尽沉香待梦来。

注：吴中旧俗，除夕小儿绕街呼叫“卖痴卖呆”，以为可将痴呆转于他人。盖人人欲求聪明也。范石湖有《卖痴呆词》。元高德基《平江纪事》载其谣云：“卖痴呆，千贯卖汝痴，万贯卖汝呆。见卖仅多送，要賒随我来。”

### 浣溪纱·送春

远去雷车隔影听，晓来推枕絮风轻，最难抛掷是闲情。彩石补成天又裂，红桑摇落浪初生。花飘无地梦无声。



霜天晓角·湾里翠岩寺

翠岩丹井，曾过孤鸿影。有客问缘廊下，呗风寂，莲池冷。且将飞雪鬓，攀临千丈镜。三十六天空彻，梦波里，一声磬。

清平乐·瑶里村暮

板桥连岸，秋送霜枫晚。采药人归藤篸满，背岭炊烟未散。晒篱收起薯干，祝鸡插妥藜栏。绿浸一溪苔石，捣衣声转前滩。

临江仙·榴花

揖送东风流水细，聚头纨扇轻开。深情总付薄笺裁。斜簪宜出浴，独坐可倾怀。满地颓阳蝉已倦，更无蝶忌花猜。行浓阴处莫低徊。晚霞吹不去，齐上晓枝来。

## 鄱湖渔歌（15首）

胡平贵，1948年生，江西南昌人

### 感事

冬初识嫩寒，晓起倚阑干。万里澄怀远，千年味道难。  
江山人共老，岁月梦随残。梳掠菟枯事，何如守钓滩。

### 与诸吟友冬游南昌长春湖限茶韵

云岫寒幽谷，苔痕曲径斜。虬松迎客迹，鸣籁逐流遐。  
岩际余青竹，酒家賒嫩茶。初阳应有日，烨烨发春华。

### 幽兰行限一东韵

秀寓深闺里，无人识灌东。岚湖山影掠，岷寺杏枝嵩。  
含笑香迎客，苍筠醉倚风。幽兰春色好，一采百花红。  
注：幽兰乡位于灌城（古南昌名）东。

### 岁末寄怀

岁寒年末近，梅发一枝冬。弹剑欲长啸，拨琴惟自庸。  
曾经古艾梦，几度汉阳峰。每忆蹉跎事，怆然听梵钟。  
注：古艾为武宁旧城名。

### 与草啸兄小游紫清山约“翁”字

朝霭弥峦峭，雄关接颢穹。居高知浩渺，涉险觉清风。  
奇石一藤绕，鹃花二度红。浅斟千古事，坐对采薇翁。  
注：冬天居然见山中有杜鹃花开，草啸戏称自己为现代采薇翁。

### 仲春与江右诸君跌水沟一日游限韵

江右七君子，相邀跌水沟。山高竹无碍，路险瀑含羞。  
云石开天豁，鹃花僻涧幽。风怀如我意，一醉解千愁。

### 迎春辞次一得韵

冰封大地且由之，一瓣心香待碧丝。雪裹暮云堪入梦，  
梅含晓雾化为诗。可人澍雨泽南国，不尽春风沐柳枝。感  
觉良辰遽如许，长歌漉酒俟襟期。

### 明月山温泉

天赐琼津恩一方，健身祛病若神汤。侧眸但见车忙碌，  
隔座尤闻酒逸香。奇石拥成金埒谷，华池妆就蕙兰乡。即  
今只作逍遥客，不问人间炎与凉。

### 和胖大海君

豫章有水宋城来，江右诗风继往开。今夜同邀滕阁月，  
来年共话郁孤台。风怀似我垂垂老，网络逢君俊俊才。南  
浦春回庭树好，小诗一首待宏裁。

### 何侠宝先生谢世两周年祭（用何先生韵）

研墨杏林双鬓秋，居然驾鹤作仙游。梅关诗赋千峰绿，  
章贡笔濡今古流。契阔多年尚书地，悬壶一世古虔州。高  
台望遍江南路，日暮乡关总带愁。

**注：**侠宝教授生前任赣南医学院副院长，江西省诗词学会常务理事。“高台望遍江南路”用何先生诗句。先生旧居赣州尚书街。二十年前我在这里初识先生。

### 赋得“一襟残照起乡思”

一襟残照起乡思，忆昔浔阳肠断时。晨哨难堪惊好梦，暮灯总是颂神词。才微只合凡尘老，心苦惟求故旧知。懦懦此生无大志，推枰把盏品新诗。

注：文革期间，余在九江读书，因受家庭问题牵连，小住牛棚两月，故有肠断句。

### 包德珍大姐以《龙海吟》见赠，集其句为谢

光明霁月画难工，每向斑斓品苦衷。蝶梦方呈新足迹，燕旋频叹竹篱空。人情织尽酸甜在，来去缘由聚散中。十里长街灯火灿，乍惊依旧似朦胧。

### 紫清山观杜鹃次仰老韵（二首选一）

春日煦和风入微，亭台旧迹记依稀。云蒸青壑地初暖，瀑落瑶池珠始飞。只为花红贪亘久，便于草绿认甘肥。尘嚣小别天高远，盘跚山林不忍归。

### 忆秦娥·花怨

秋风烈，夕阳残照梧桐叶，梧桐叶。等闲到了，落花时节。江南总是相思月，山居常掩含情榭，含情榭。黄花绽似，玉人香靛。

### 祝英台近·无题

燕归来，春一度。魂梦是何处？纵上高楼、难望雁回路！平林漠漠千重，长堤垂柳，怕偏见、愁云愁雾。几回顾，去岁同话秋风，秋来菊无数。菊亦缠绵、却被北风妒。如今惟有相思，思时无尽，恐难得、与君相叙。

## 鹰鸣(11首)

邵英明，1947生，江西都昌人

### 咏雪

借得风狂势亦狂，乌云播雪乱飞扬。遮天遮地弥山水，  
不想乾坤有太阳。

### 咏莲

长在淤泥里，餐风顶酷阳。轩昂君子气，通达哲人肠。  
雨洗形尤丽，暑熬花更香。周身污不染，亮节骨间藏。

### 游吴城

览胜吴城宿愿酬，望湖楼上举双眸。修河赣水身前汇，  
古埠新城眼底收。破浪巨轮如小鸟，连天绿草漫荒洲。由  
来兵贾相争地，往事如烟梦里游。

### 鹤舍村写生

鹤舍苏山左蠡边，沧桑阅尽见尧天。成排风火棋盘屋，  
满壁诗书字对联。画栋雕梁凝古趣，小桥流水奏新弦。条  
条麻石平铺路，走出英才遍大千。

### 登梅州千佛寺宝塔

佛塔高擎云与天，群山一览远连绵。青松翠竹弥三径，  
佛祖观音列两边。满壁浮雕姿百态，先朝妙对响千年。梅  
州鸟瞰盘中画，曲折梅江画里穿。

### 丙戌迎春曲（二首选一）

迎春万物各争先，神犬仙鸡两让贤。斗雪红梅香满院，  
应时甘雨润连阡。燕翻玉剪来梁上，莺掷金梭绕树边。嫩  
柳抽条风起舞，向阳道上早扬鞭。

### 赋得一襟残照起乡思

一襟残照起乡思，故里童心梦里驰。取鸟捕蝉轻寂寂，  
摸鱼捉蟹美滋滋。晨嬉弄笛花凝露，夜浴卧波星满池。每  
忆当年无限趣，休闲乘兴记为诗。

### 为深圳招商局向女士“西藏游记”配诗

漫行西域看洪荒，雪拥群峰万古长。瀑布流霞蓝海子，  
草原戈壁野羚羊。酥油茶款天边客，稞麦酒飘云外香。梦  
想成真魂起舞，挥毫乘兴作诗狂。

### 采桑子·中秋望月

愁心怕对中秋月，对月心酸，泪洒栏杆，月满人分感  
百端。    心痴对中秋月，露湿衣冠，秋水望穿，诉尽心  
思盼月传。

### 阮郎归·思盼

别依容易见依难，痴痴望远滩，高山流水对谁弹，心  
埋苦海间。    朝踏露，夜凭栏，潜潜泪满衫，梦中偶得  
一时欢，相亲不等闲。

丁小玲（女，江苏）

### 梅二首

春温难上读书灯，枯坐无言形似僧。拈管端因诗最契，启轩只为鸟如朋。山南舒卷湿云沓，亭北澄鲜新雨仍。又共梅花添一岁，冷香飞到阁三层。

柳瘦梅新记印痕，烟封雾锁郭边村。篷舟偶过浑如画，雏雀初飞不畏人。风扫香云春已半，影圆潭水月难温。夜吟遥寄相思苦，可到西溪三百盆？

三水（北京）

### 感时-步老杜韵

晚风拂我酒痕衣，走马都门失所归。鹿在江湖逐生死，星垂荒野感依稀。么弦无定调琴懒，雄剑难藏破匣飞。九派茫茫寻去路，四厢声像总相违！

### 无题

来是空灵去亦空，雪鸿何处觅行踪。无边牵挂续还断，一点幽思始即终。灯下通宵焚故稿，花前满面笑春风。且将毒酒当甘露，相约桃山万里红。

三江有月（湖北）

### 金山寺

斯玉何时浮，江海何时朔。开山遇黄金，山寺相存擢。

因传降白蛇，执法违天数。可怜大道僧，折名于未觉。遗臭千百年，不曾与人驳。今再过金山，方知裴君乐。江与海俱消，中冷终易汲。法固非本原，塔上旗剥剥。

### 丁亥九日霍山登高同用小杜九日齐山登高韵

唤得山飞我未飞。横肩太吕力犹微。遥思英霍因名合，同属皋陶不许归。四下红林浮灼火，十分爽气着寒晖。峰颠久立贪汾墨，收拾秋云数振衣。

### 门前五柳（浙江）

#### 次韵古今兄并答赠

人道吾生也有涯，浩然一笑帽欹斜。每来携酒听飞鹭，谁与登楼看落霞。好梦无妨成画饼，怡情想必适涂鸦。回头瑟瑟弹歌处，知在云间第几家？

#### 自嘲

岂无桀骜在心胸，方寸之间有岱宗。处世曾知羞腐鼠，贫居未翼用潜龙。披襟一啸芸窗月，负手三思石涧松。谁谓琴心多晦涩，风情不解去临邛。

### 小香山（南昌）

#### 分“又寻江路探香来”韵题陈会羽仙阁得来字

平野烟分一水裁，波光落尽远长桅。雏莺已醉衔音去，峰色趁闲过岸来。有客登楼云入袖，何人横笛缙沾苔。幸无细墨壁间萃，尽付仙家天上猜。



王冰（北京）

闻诸君听伯元谈佛后赋诗限压窠字也试一首

五叶分花启达摩，梵音妙曼驻云窠。徒攀宝筏灵根浅，  
尽洒杨枝宿业多。证得空门唯月影，从来正道是风波。传  
心又作尊前笑，却指牛头会我么。

王蛰堪（天津）

浪淘沙近·和晦窗兄

柳丝弄袅，鶺鴒声啼老。低徊漫步蹇芳道。甚当年、不  
识月好花好酒好？书灯哪更重相照，雨窗轻悄。醉馀  
谁会今情调？怕醒时，叹梦渺春渺人渺。

王燕（北京）

阅蜚晦二兄新词唱和感赋长句

知有吟怀胜酒浓，酬心答意两雍容。款抛珠玉三千颗，  
闲叩宫商十二钟。冰雪为添今日兴，江河更作岁时供。不  
妨随趣池塘草，任是残冬绿也从。

天一谷（萍乡）

无题

长安陌上又飞花，得意春风三二家。鱼市贩夫争好价，  
小楼立到日阴斜。

## 无稽斋主（四川）

### 江右月课奔月压“奔”字

明昭国势若朝曦，漫遣飞星向月奔。但得乾坤行至道，宁将天宇破新痕。世风已是江河下，尘海仍凭虎豹尊。窃药嫦娥遗恨在，清辉曾不照寒门。

### 以诗代柬邀晴轩先生滴水岩赏桃花

三月桃花水，春山秀色多。云岩腾瑞霭，芳树列琼柯。林下衣冠聚，湖边气象和。重来同胜赏，欢会意如何？

## 公子无痕（女，昆明）

### 鹧鸪天

随酒花时断雁书，背灯微雨润蘼芜。黄茅冷暗收残句，紫苑余香忆绿珠。冲瓦燕，似怜吾，笑言不必慰心孤。相逢原只梦中有，何况经年梦也无。

## 风过苍筠（女，驻马店）

### 夜寄

相思不成寐，独倚小窗前。有酒消长夜，无心理旧笺。香浮花簇月，风过竹为弦。翻似痴人语，声声入远天。

### 异乡怀远

晓风吹过一襟寒，九九佳辰空自叹。绿蚁难邀知己醉，

清霜偏促鬓丝残。梦中岁月何堪忆，客里湖山不忍看。独有长江真似我，肯将心曲作波澜。

### 月影轩主（杭州）

#### 画意

鸬鹚啼静夜，野宿倍思君。一树支山月，片帆张海云。居长客成主，诗久梦如文。忽有清风语，凭栏独自闻。

### 文若（江苏）

#### 西风

斗柄插华表，山河起庚音。云衣如百纳，天目欲千寻。抱柱依残月，翻眸戏冷禽。空携离别令，不扫故人心。

#### 无题

掬指流光不可追，秋风又上远山眉。月曾共钓清如许，莲若初尝苦未知。疏以青蚨来地位，漫从黄菊下天资。东君他日归何处，劫后桃花岁岁迟。

### 方知秋（女，江苏）

#### 蝶恋花

自是沉吟风不断。吹过闲庭，吹得残花乱。可惜昼长兼夜短。相思谁为怜娇软？  
隐隐清池荷作伴。一岁孤单，岁岁孤单惯。纵使怜郎千里远。幽幽怕问南来雁。

### 金缕曲

凄绝池边树。染斜阳、风犹骤起，清寒如故。乱草随人频点首，暗色催成薄暮。谁更作、泪零苦雨。掩饰情怀惟浅笑，到人前强作关心语。愁也在，何曾住。柔肠又是天涯路。忍相怜、黄昏以后，蜂飞蝶舞？月也无声云后隐，惆怅此情辜负。说不尽、生如羁旅。隐隐忽来啼鸟怨，道伤情总是多情误。花开了，花落去。

### 叩石山人（北京）

#### 水龙吟·前夜

梨花过了春晴，天津桥外杯重把。玲珑玉珥，歌喉舞扇，翩然来下。座上公卿，怀中素手，一时潇洒。记兰舟初发，几人都去，分明在、灯阑夜。别是曾经说话。又依然、轻驱车驾。飘零踪迹，天涯何处，被风凋谢。涕泪谁堪，青衫赢取，江州司马。怕今宵一梦，明朝更远，只情难画。

### 东篱菊（女，靖安）

#### 八月十八夜见月

红壁悬天久，独行竟不知。远山深伏兽，孤笛杳如危。透水幽风印，出林渔火窥。兴阑拂衣去，衰草莫相随。

#### 咏风（其一）

游戏俗尘里，扶摇事已空。枝头吹雪落，海角逗花红。

悱恻三秋雨，淹留子夜钟。白云无路径，犹自逐西东。

白晓东（北京）

初识晦窗先生于京华，席间醉卧失态，作此谨表愧怍之情

寒窗自负苦吟身，不解春风醉煞人。花泛东南香趁雨，蝶翻上下梦通神。颓唐酒后藏迂拙，潦倒君前博率真。已任无诗罚金谷，他年合做扫门宾。

血叶兰（女，丰城）

五一感怀

心无七窍也晶莹，私淑比干稽会明。催缴收支盘算细，平衡借贷账单清。青春兑现成风景，时尚摊提任我行。笔墨方闲犹眷恋，怡然自得抒豪情。

刘雪樵（女，北京）

读李重华过居庸关诗有感，次其韵

乾坤一梦几循环？不尽烽烟乱障间。每见千寻沉晋水，何曾万里镇秦关。荣华但逐黄粱醉，忧患还凭素履闲。静夜无言望明月，清光倦倚旧河山。

齐卿（长沙）

虞美人·扬州十日六甲子祭

长淮千里淋淋血，却似随尘绝。扬州城外尽愁云，问

取史公何处可招魂。    怎堪梅岭空余痛，尤恨衣冠冢。  
当时埋去汉唐装，三百岁来风雨一身凉。

### 乡行

乡山犹未改，归路渐成稀。户远青烟杳，天垂新雀啼。  
数牛耕垅亩，一地好秧泥。夫欲问农策，春风扯我衣。

### 安宁狂生（四川）

#### 水龙吟·次韵章质夫、苏子瞻杨花词

至今人误浮萍，更兼风里茫茫坠。谩春何用，怜红恶白，东君无思。尝慕佳人，萦徊帘侧，可怜窗闭。纵游丝眷惹，啼鹃唤返，江湖志、深深起。    从此。天涯游戏。自由飞、不消点缀。琼衣素缟，冰心纯雪，宁为玉碎。沟赴流渠，尘归掩土，涛翻沈水。似裁云作絮，洋洋洒洒，那伤心泪。

### 江左人氏（江苏）

#### 秋柳（三首选二）

江潭摇落亦堪怜，不系高阳载酒船。冷雨萧疏犹弄影，  
春风骀荡更生烟。灞桥西岸撚羌笛，彭泽东篱拨阮弦。此  
日枝条君折取，相逢二月待来年。

千枝低亚有谁怜，却和骊歌送客船。湖上诗情堪压卷，  
殿前人事尽成烟。已无黄鸟巢连叶，犹有青条拂乱弦。常  
道杨花输腊雪，秋来春去一年年。

女儿腰细几人怜，苏小门前罨画船。他日金黄风摆首，  
祇今玉碧月笼烟。留连城北徐公美，惆怅墙东楚客弦。不

教新词蛮素舞，香山白傅应知年。

## 江南雨（北京）

### 临江仙 · 客中感梦作

清晓流莺惊梦，凭窗目送芳尘。小楼一夜醉氤氲。江南春意悄，枕上客愁新。记得湖边初遇，满天花雨缤纷。柳条柔似鬓边云。料知花尚在，空老看花人。

## 红尘（长沙）

### 次韵黄景仁绮怀诗（十五首选二）

梦入天台百恨轻，最无人处觑花明。胭脂微湿宜春面，翠黛深藏锁客情。青鸟飞来愁不语，紫鹃啼去泪先成。惘然独坐西窗夜，不忍当檐断续声。

长宵何处忆湘灵？往事如烟绕画屏。春绿遥溪歌婉转，秋红深径语丁宁。几多嗔笑心头住，一种幽愁眉上停。拂纸欲书还罢笔，奈何帘外挂双星。

## 苍筤（景德镇）

### 梅语三章（选一）

天地生吾惠亦深，坚贞为质洁为襟。横斜疏影摇春梦，隐约清香绕梵音。花为诗人添好句，果供恋侣缔初心。溪头篔竹诚知己，万叶萧萧为我吟。

### 伴孙夜读

手捧花瓶过小桥，育孙重担老人挑。百蔬日换调蝉口，

千计时防溺鼠标。孤诣苦心添白发，鸡声灯火炼玄髻。生逢岗少人多日，十载寒窗免一枵。

苏痕（女，常州）

### 游园

白塔青桥小渡头，满身斜照系扁舟。吴山依旧碑无恙，过客如今鬓有秋。苔色绵延迷古字，枫魂变幻衬红楼。重来谁是三生约，石像年深认得不。

### 满庭芳·雨夜有感

细雨侵门，冷风穿竹，一灯萧索窗棂。淡眉人在，掩卷倚帘听。渐过芳菲节气，桃杏杳、化作无情。春心向，池塘旧梦，漪碧涨浮萍。飘零，何止是，堂前倦燕，阶下残英。笑空瘦流年，只剩幽屏。不怕韶华不待，怕块垒、诗酒难平。勤珍重，尘缘似幻，休去问分明。

杏花笛影（北京）

### 鹧鸪天·同学会

一别经年各自殊，转蓬流落满江湖。樽中犹觉真情在，话里方知稚气无。微醉也，笑相扶，也拿合影说当初。沧桑最是额前发，脱到如今不用梳。

李静凤（女，南京）

### 西河·早春过台城

江雪霁，城高袖满清吹。荒寒一抹六朝天，夕阳在水。



鼓鼙动地拥楼船，千年都渺云气。任来去，新燕子。  
柳绵渐吐烟翠。歌残玉树并脂痕，事如梦里。九重废堞黯  
苍苔，沧桑沉寂如此。北湖澹远暮四坠，蒋山青，含  
恨凝紫。且上豁蒙寻味，甚繁华世外平芜萧寺，霜杵浮生  
空惊起。

### 谷海鹰（女，北京）

#### 浪淘沙近·和晦窗

绿蕉乍卷，红榴初唤。风前抖落闲恩怨。瘦萍痴，欲  
证海浅桑浅梦浅。蜂鬚蝶翼交相乱。十三徽半，玉纤轻  
抚香成片。觅馀欢，怅客远云远鸿远。

### 冷锋（南昌）

#### 参加全国城投信息会有感

虹桥一纸通苍海，海角天涯聚友来。谋面虽初如旧识，  
烹茶向晚月凉台。

### 阿威（葫芦岛）

#### 自况

近水而居鸥未亲，当途想必久蒙尘。探花风絮时常起，  
看海心情逐日泯。歌自成吟无所事，网何必戒有闲身。眉  
间空结山川气，应是诗书作弄人。

### 也说于丹

巧舌如簧媚俗姿，清谈故事论吾师。适从岂可刀平足，仰止何须语陵迟。游说谁怜筋骨瘦，逃亡自叹犬儿欺。后来九五如佣者，弟子三千尽粉丝。

### 张力夫（北京）

#### 与蛰堪盛元京西雅聚，居庸诸子相约同赋

辜负京华桃李辰，久无清兴约芳春。桥延六里接双驾，车自八方飙四轮。诗道精微纯任性，酒卮酣畅好修身。尊他北海匡庐客，落笔惊风不染尘。

### 张伯元（北京）

#### 雪

三月忽飘雪，春花几树偕？深山来短信，钓我剡溪怀。

#### 景山腊梅

神醉清风侧，天香容易得。梅花今早开，与梦同颜色。

### 青青子佩（女，南通）

#### 浣溪沙

梦里青山云外来。千层细浪涤尘霾。阿谁鞭石蜃楼开。隔岸烟岚笼黛影，流沙岁月印红苔。应知极目是天涯。

浣溪沙·送友归乡有作

柳岸逶迤潮水平。兰舟摇碎满天星。离筵散罢已三更。  
云卷云舒空缱绻，人来人去复零丁。明朝不必问行程。

林清晓（女，江苏）

雨思

——丙戌年末作

雨线风梭织岁华，书窗一梦老生涯。已灰七窍凭尘翳，  
徒有馀情供笔花。依旧春归落梅影，偶然思寄故人家。浅  
深聚散皆无定，渺渺沧波逐海槎。

采桑子·用阳春韵

冬残莫道余寒杳，云幕微开，星眼犹灰，斜月幽幽蹙  
淡眉。何当心事同流水，无语低徊。夜静风回，几处  
清香坠腊梅。

雨如（唐山）

座中友人欲弹而罢

日暮蒹葭远，维舟柳岸停。未弹秋水碧，先敛黛眉青。  
风散违弦轸，云沉压杳冥。闻磐钟子恨，莫遣旧歌听。

登黄鹤楼（二首选一）

浩浩青滩下，晴川玉带回。南通湘水阔，西极楚云开。

不复千帆竞，何曾一鹤来？苍茫深树老，指点有余哀。

### 金水（北京）

#### 清明前一日晦窗来京小酌之余相约赋此

病余不觉万花辰，只劝壶中潏滟春。都邑已亡千岁郭，羲和犹骋九天轮。横流他日成沧海，倦蝶先期作化身。珍重今宵能此会，裁诗聊记帝乡尘。

### 赵京战（北京）

#### 步是务斋主韵致晦蛰二兄

居庸叠翠宴佳辰，斗柄杓端皆指春。暂借瀛台接尊驾，管教寰宇仰冰轮。津门酌海轻濡笔，鄱口钓鳌闲隐身。细拣新翻钟吕谱，一吟可净九天尘。

### 秋灵（女，台湾，现居美国）

#### 无题

满庭风草草，漫压春声倒。有句不堪吟，一吟新岁老。

#### 临江仙·五月榴花

半晌贪欢賒一梦，偕风劲舞襟开。石榴裙是呕心裁。此情深刻骨，前事耿于怀。翻掌充笺书腴腆，流行话语君猜。相思树下久徘徊。暮垂疏影乱，对对蝶飞来。

## 临川沐风（临川）

### 三绝句

霜飞霰落及花身，百劫纷然奈有因。偏是秋心难去舍，伊人独立倍伤神。

劫来独自只心惊，五夜鸡声不及宁。何处尘间消此恸，伊人憔悴日羸倾。

山花依旧斗婵娟，消落如何得释然？今世争春已无意，安宁便是一生天。

## 贺兰吹雪（广州）

### 点绛唇·次定庵“一帽红尘”韵

月影阑珊，那人浑在栏杆北。小园春色，终是红墙隔。独自踟躇，十里街灯灭。行人绝，心潮如叠，翻作鹅毛雪。

## 离垢居（女，株州）

### 秋之为气

秋之为气，万木苍黄。念彼佳人，砭骨深凉。吾之行役，其期也长。百感于心，行迈踉跄。

秋之为气，动此凄怆。念彼君子，痛莫能将。日居月诸，盍感其光？风雨如溃，于衣于裳。

秋之为气，兰草为创。念彼佳人，未能或忘。短裳五彩，绣彼鸳鸯。封之寄之，幸毋逸忘。

秋之为气，下此严霜。念彼君子，泪落汤汤。短裳五彩，害替害偿？见之益悲，言束言藏。

## 海风（星子）

### 白鹿洞书院侧之诗墙

越涧缘石径，绿密压山影。秋阳晦复明，白羽时过顶。  
蹶足出尘迹，天籁惟自省。一壁忽前横，森森四野靖。砖  
石涵青苔，莽草漫婷婷。恍若之墓墟，刻碑纷然耿。斑驳  
辨斯文，俱是今人咏。文质允彬彬，二子独出挺。余者当  
沐猴，衣冠以为病。诗学信已歿，埋此荒郊岭。夕阳堕山  
深，谁为立有顷。

### 望江亭

谁为凿悬壁，立此望江亭。玉径埋烟霏，娥黛斐然青。  
山花散红艳，空气怀芳馨。朝来蚩尤盛，伸掌未见形。万  
物皆乌有，安为天地图。惟觉凉风发，飒爽吹昏醒。坐亭  
心悠然，恍恍通精灵。神灯渐出没，万盏如天星。飘忽无  
定止，倏尔化飞萤。元妙不可语，仙心唯可聆。汗漫何潇  
洒，红尘何零零。我欲从之去，灯光忽已冥。惊起仍茫茫，  
中心乃闭扃。追思长太息，此去服参苓。

## 梦烟霏（江苏）

### 夜坐二首

夜坐空怀审画屏，红禅绿意出苍冥。淮南王气同鸡犬，  
江左风流旧魄灵。入世几逢阿堵物，举头不见启明星。人  
前浪说鱼龙啸，卷上珠帘仔细听。

梅枝数棵矮墙东，取酒封章事渐空。黯黯花香天上月，

沉沉心事北来风。一拳星海愁般大，十万光华夜正中。便指青冥浑欲睡，长街灯影远如虹。

## 萧散

### 丁亥重九次小杜韵

孱颜千丈一鹰飞，苍树浮埃俱入微。日丽山河开倦眼，酒浇块垒曰忘归。略无心绪坐丛菊，但向寥天送夕晖。顾看重城灯火渐，微生风露着人衣。

### 散柯（上饶，现居北京）

#### 将归四章（选三）

##### 将归

远忆越江雨，归期不与人。孤篷尚有驻，辗转命吾身。旧服识秋气，相思唯老亲。西风堪伴钓，为采蓼花新。

#### 约诸弟于豫章

弟兄已长大，如我转蓬身。此日期再逢，同为异乡人。即席杯重把，临别各自珍。家乡俱和好，不必泣风尘。

##### 丹桂

西山丹桂树，不记种何年。春雨见华茂，秋风复渺然。帝京古木落，南国碧云卷。应识归去晚，看人花满肩。

### 绿杨烟外（女，重庆）

#### 题图

未肯心痕褪一斑，无聊时向月中看。凭它玉笛吹成血，  
依旧霜风只送寒。

### 西江月

细雨秋声寥落，长街夜色朦胧。一从别后各西东。相  
见翻疑似梦。莫把离愁轻诉，应知水隔山重。当时未  
悟是情浓。悟了已然成痛。

### 翰海胡杨（景德镇）

#### 齐天乐·与友人同游上饶云碧峰遇雨

晓空云暗凉风起，羁怀更添秋绪。野径香残，深林碧  
乱，同坐危亭听雨。河梁记否？叹身似飘萍，欲留还去。  
漫检游踪，桂华独照梦中路。闲看信江逝水，绕城淘  
不尽，尘世寒暑。蚁穴苔生，梅根酒醒，唯有青山如故。  
愁丝万缕。怕霁日催归，又成孤旅。极目遥岑，薄烟迷雁  
羽。

### 夔庵（济南）

#### 冬夜怀慕容兄

闭关真欲拟玄经，岁别空知望夜屏。酒约东篱衣尚白，  
诗传北牖眼偏青。家山草色王孙梦，湖海云光处士星。一  
卧江城梅又落，吹残苦竹与谁听。



## 滕王阁雅集启

敬启者

吾江右文脉，肇自陶元亮渊明。其后有唐刘慎虚、王季友、陈陶诸公，各擅其美。至宋欧阳文忠公修、王荆公安石、曾南丰巩、黄山谷庭坚、杨诚斋万里、姜白石夔、文信国天祥，无不开宗立派、独领风骚。洎宋以降，有虞道园集、揭文安公傒斯、范德机棹、句曲外史张公羽、陈散原三立、陈义宁寅恪，亦推文章宗主。然自国朝鼎革以来，江右文风式微，不绝如缕。故吾侪生当盛世，宜振凋起敝，克绍箕裘，使吾赣诗风丕振，雄风再起，鼓旗重开，吾侪其勉哉！故某不避谗陋，与同仁倡一雅集，预于三月初三日（公历三月三十一日），与诸江西籍诗友聚於南昌滕王阁下，共商豫章诗社成立事宜，望诸位念桑梓之谊，辗转相告，踊跃来赴，故布告於此，希版主置之於顶，吾等感激不尽矣。

执笔：剑川（丰城） 丙戌岁杪

拟邀发起同仁：

丰城：剑尘；都昌：一得愚生、红叶；南昌县：殊熠在天；萍乡：风生水起（水击三千）、李汝启、孤鸿远影；南昌：阿二、寒砚；上饶：披云、翰林院的老鼠；星子：海风；九江：浔阳倦客；景德镇：柳父；泰和：剧饮千杯；赣州：sun19691969；临川：楚成；靖安：东篱雪；南城：龙文鸳侣；婺源：天涯倦客。

豫章诗社筹备组QQ群：21268607

## 江右诗社成立大会纪要

——剑川

2006年3月31日(农历三月初三上巳节),来自江西各地的诗词爱好者共15人,在省城南昌共同举行江右诗社成立大会,出席成立大会的诗友分别为:剑川(丰城)、一得愚生(都昌)、水击三千、江湖小李(萍乡)、殊熠在天(南昌县)、剑尘(丰城)、剧饮千杯(泰和)、草啸、天堂有鸟(南昌)、邵英明(都昌)、菜人、徐忠明(新建)、楚成(临川)、东华人氏(临川)、王震宇(辽宁,客籍)。

与会诗友在滕王阁汇合后,先后在象湖风景区、青云谱八大山人纪念馆参观游览,并就诗社名称、立社宗旨、发展方向、人员分工、运作方式、刊物编辑等方面的问题达成了一致。聚会始终在热情、友好、民主的气氛中进行,大家广泛交流意见,提出各项建议。最后,聚会在圆满完成各项议题后结束。详细情况将在随后的帖子中介绍。

会议首先讨论了名称的问题。鉴于豫章郡在古代特指南昌,代表性不够广,明末南昌万时华等人也成立过一个豫章诗社,所以决定改用江西古代一个雅称江右,来作为诗社的名称。

关于诗长社长人选,大家认为梅云(熊盛元)先生是我省著名诗词大家,在全国具有广泛的知名度和影响力,所以一致推举梅云先生为社长,以摄社务,并兼社刊主编。剑川为秘书长,主持日常工作。诗社另设版主和编委7人,暂由剑川、一得愚生、剑尘、水击三千、殊熠在天、剧饮千杯、江湖小李和草啸担任。

关于会员问题,仍然向所有江西籍和与江西有深厚渊源的人士开放,入社条件暂时不变,设立客籍会员和贵宾

数量不会太多。正式会员身份的确认需要交纳会费，一年为100元，账目完全公开。所有开支需用于社务，还需全体编委同意。经费由剑尘代管。

关于刊物问题，网络版由一得愚生进行技术管理，正式出版物稿件征集方式为：首先在网络上开辟专栏进行收集，每人将自己满意的作品10--20首发在本栏中，交由编委进行选集。出书采用繁体竖排还是简体横排，届时听取多数人意见。

## 周年庆典萍乡小石源雅集侧记

——江湖小李

丁亥谷雨(07年4月20日),江右同仁齐聚赣西萍乡,相与唱酬、共商社务。“是日也,天朗气清,惠风和畅”。会期三天,依当地诗友安排,先后参观了百年安源、天下第一洞—孽龙洞、佛教禅宗杨岐宗祖庭—杨岐山普通寺、晚清词家文廷式墓、反清第一枪—萍浏醴起义(史称丙午暴动)旧址麻石街龙王庙、反元教首彭莹玉祖师道场—瑶金山寺等。

21日,江右小石源雅集,主人招待以农家菜,红薯酒。除江右同道外,友社北京居庸金水、张伯元,长沙柳堂、心魔以及上栗当地诗友数十人与会,金水等诗兄即兴书法。联云:喜契良师益友,评点周风汉赋,绍宋承唐,他年派衍新江右;

莫嫌地僻穷乡,俨然楚尾吴头,襟湘带赣,此地名传小石源。

## 江右诗社名录

顾问：仰斋

网络技术：顺顺

(以下按笔画为序)

一得愚生、天堂有鸟、云中鸾（女）、云海、水击三千、东  
华人氏、向闲、江湖小李、红土川原、红叶、抱月斋、草  
啸、剑川、剑尘、胖大海、浔阳倦客、菜人、殊熠在天、  
虔青草、剧饮千杯、梅云、皎月（女）、紫藤（女）、楚成、  
颖庐（女）、鄱湖渔歌、鹰鸣

## 江右诗社大事记

1. 2006年3月31日（丙戌上巳），江右诗社于南昌象湖公园成立，共推梅云先生为社长兼社刊主编，剑川为秘书长兼社刊副主编，成立临时编委会，成员为：一得愚生、水击三千、江湖小李、草啸、剑尘、殊熠在天、剧饮千杯；
2. 2006年4月20日，于网络设立江右诗社临时论坛，一得愚生为网络负责人，水月无痕为论坛管理；
3. 2006年11月9日，聘请诗坛耆宿仰斋老为江右诗社顾问；
4. 2006年12月21日，江右诗社拥有独立网络域名，永久论坛建立，一得愚生为负责人。殊熠在天、鄱湖渔歌为论坛管理；
5. 2007年4月20日（丁亥谷雨），江右诗社同仁雅集于萍乡小石源，邀请了居庸诗社及湖南、河南、河北和本省诗友出席，共为立社周年庆典；
6. 2007年7月18日，一得愚生辞去网络负责人职务，由剧饮千杯继任，同时和剑尘辞去编委，增补向闲为编委；
7. 2007年9月10日，聘请顺顺为网络技术顾问；
8. 2007年9月28日，解散临时编委会，成立江右社委会，成员为：一得愚生、东华人氏、向闲、草啸、剑尘、浔阳倦客、剧饮千杯、鄱湖渔歌；
9. 2007年10月6日，著名词家颖庐先生入社。
10. 2007年10月6日，于南昌召开首届社委会，增补草啸为副秘书长兼网络负责人；
11. 2007年12月，江右诗社纸刊——《江右风雅》（初集）出版。

## 跋

傅义

吾江右诗社同仁借网络传递之便，每有所作，即发帖交流，互相切磋，朝夕奋发，因而进步迅速。成立方年余，虽起点有高下，水平亦参差，然皆有可观，足以登大雅之堂，跻作者之林。其早已蜚声海内，享誉吟坛者固无论矣。尤可贵者，成员予以外皆周甲以下人，而以六七十年代出生者为最多，亦最活跃。异军突起，头角峥嵘者已不罕见。所树论坛社内外网络诗人荟萃，佳篇隽句，层出不穷。为巩固成绩，鼓舞士心，继续奋进，在熊盛元社长领导组织下，社员自呈作品若干首，经剑川，颖庐，一得与熊社略加筛汰定稿，并于社外所发诗帖中挑选部分，以资观摩，由一得统编付梓。予乐观其成，欣然命笔，志此数语以为跋。